

續金華叢書





少室山
房類稿

金兆豐署檢

甲春康宗校
子永胡榭鋟

自余結髮而好言詩所與海內豪儁游亡不以詩進者犬馬齒日益稍見所論著則諸豪儁自喜行其詩少不以詩請者余之不能工爲伎不能使人極意以爲艱而思謝去之幾且焚筆研而最後乃爲胡元瑞序少室山房詩元瑞之爲言日子所可必者一所大可恨者與我所不子負者各二子甚幸我而我薦其傲帚以希一言之華袞則可必子許我而不卽寵施我卽子一旦不可知大可恨我雖晚猶幸及子而不終子之惠使後世疑其異時不相當大可恨卽子過許我而我竭蹶步武以求踐子之許不子負有所彈射而我惕焉以子爲鑪盪不子負子以爲奚若余乃謂元瑞毋刺促請息焉而爲若序余之得元瑞於余仲者半歲所而元瑞進其詩余觀之未嘗不三擊節歎也天不靳人以材而人顧取其凡者氣之流行亡所擇而取其濁者去弱猥者古人不秘格於後人而取其下中者天又不秘其聲色以供吾詩而聲取其蠅哇者色取其黝蠹者象日吾接吾汰其精而英者情自吾發吾不衷其肺腑者以是而治詩以是而號於人曰吾

善詩吾善詩者何也元瑞材高而氣充象必意副情必法暢歌之而聲中宮商而徹金石覽之而色薄星漢而攄雲霞以比於開元大歷之格亡弗合也余嘗語乎仲諸前我而作者涵洪併織與亭毒並吾故推獻吉然不能諱其滓絕塵行空卿雲爛兮吾故推昌穀然不能諱其輕刻羽雕葉舍陳而新吾故推子業然不能諱其促鞭風馭霆以險爲絕吾故推子相然不能諱其踈融而超之于鱗庶幾哉然猶時時見孤詣焉後我而作者其在此子矣夫其在此子矣夫以今證之抑何左契不爽也亡已而有子規者在昔鞠傅之稱田光曰智深而勇沈不深不玄不沈不墜入之沈深出之自然完之粹然如大鈞雕物而不見工如良工夜輝而泯其痕斯三百篇西京建安之懿乎是集也其始基之矣而猶未也子之邦君有喻子者其問梓焉而以不佞言質之萬曆辛巳仲夏朔日弇山人吳郡王世貞譔

石羊生傳

兗州山人王世貞

胡元瑞者名應麟一字明瑞嘗自號少室山人已慕其鄉人皇初平
叱石成羊事更號曰石羊生人亦曰元瑞殆非人間人也仙而謫者
也遂呼之石羊生元瑞父曰按察公僖母宋宜人按察公爲行絕類
萬石君而文藻過之所至好行陰德名位不甚稱以雲南按察副使
歸今尙壯無恙元瑞爲兒時肌體玉雪眉目朗秀五歲按察公口授
之書輒成誦見客客使屬對輒工九齡從里社師日佔俸習經生業
而心厭之俄悉祛按察公篋得古文尙書周易國風雅頌檀弓左氏
莊列屈原兩司馬杜甫諸家言讀之按察公奇其意弗禁也稍長遂
能爲歌詩藉藉傳里中而于經生業亦不廢十五補博士弟子員非
其好也會按察公拜尙書禮部郎挾與俱渡錢塘過吳閭汎揚子北
歷齊魯趙魏之墟至燕市而止所經錄弔古卽事往往於詩歌發之
而是時南海黎惟敬歐楨伯梁思伯吳郡周公瑕吳興徐子與嘉禾

戚希仲沈純父永嘉康裕卿先後抵燕發元瑞藏詩覽之咸嘖嘖折
行請交至於琳宮梵宇高會雅集元瑞以齒坐末坐片語一出無不
恍然披靡自失也曰使用昔賢隸事奪席例吾曹無坐所矣臨淮小
侯李惟寅募元瑞甚使客募而致之爲上賓旬日不聽出惟寅用是
亦以詩名而周宗正權甫雅自負風雅有人倫之鑒貽元瑞三十韻
首以北地信陽相屬元瑞益自信尋以按察公外除元瑞歸從母里
中母患頭風甚劇元瑞委身醫藥間日夜扶持不休母頭風良愈而
身過勞得清羸疾矣因跳匿金華山中而會大司空萬安朱公衡還
過蘭谿朱公故從燕見元瑞詩而驚賞者至是發使山中蹤跡得元
瑞以書要之而泊舟待三日元瑞感其意爲長歌七百言以贈朱公
公袖示督學使者滕君伯輪曰天下奇才也滕君輒超格檄受餼學
宮且趣入試兩御史再試再爲諸生千人冠已薦鄉書上公車報罷
元瑞意殊不在一第其所游從皆天下賢豪長者然所當心獨余兄
弟與李觀察于鱗汪司馬伯玉吳叅政明卿會于鱗死餘皆散處不

相及久之意邑邑不自得而余弟敬美與觀察公同年過蘭谿謂觀察吾欲就阿戎談當勝卿遂卽元瑞劇語二夕皆申且臨別眷眷不忍釋曰吾於詩獨畏于鱗耳已矣今庶幾得足下又曰幸與家中丞同世胡不一及門卽卒然抱于鱗恨若何時余方謝客曇陽觀聞元瑞來喜不自勝力疾啟關與爲十日飲間出所著少室山房詩余得而序焉所以屬元瑞甚重而用是頗有斷斷者余二人俱弗顧元瑞乃高卧山中不復就公車而蘭谿令喻邦相豪於詩與元瑞意合忘形爾汝嘗偕過趙學士山房倡和連日夕元瑞之卧山中凡六載而始上公車至都下遇張觀察助甫助甫余兄弟友也讀元瑞詩擊節曰二十年亡此調矣元瑞亦奇明甫詩契密無間且各自悵相遇晚試復罷歸時大司馬張公肖甫靖浙難過元瑞里元瑞避弗見張公謂按察公公兒佳甚故知之今難我得非以使者惠文嶽嶽耶爲我致之錢塘請得具賓主禮元瑞乃強爲錢塘謁張公果以上客客之會伯玉來湖上大將軍戚元敬系至伯玉數與元瑞相聞問把臂劇

驪出元敬七絕句詫之曰大將軍健兒也乃能作文語不下沈太尉曹竟陵生亦能賦贈我乎元瑞援筆千餘言立就奇思滾滾旣大將軍集相向嘆賞不置伯玉因曰我欲之海上訪王元美兄弟生復能從我乎元瑞曰吾心也遂同過弇州園伯玉道爲少室山房集序其重不下余時偕元瑞至者伯玉弟仲淹仲嘉而張大司馬亦以內召跡伯玉而來尋先別去余兄弟與伯玉元瑞諸君積日游弇中甚樂也元瑞性孤介時時苦吟沉思不甚與客相當至其揮麈尾抗藝文持論侃然尤慎于許可有莫生者躁而貪以品不登上中側目元瑞甚屬伯玉元敬游西湖故遍置坐客爲闕端元瑞夷然弗屑也及在弇仲淹被酒狎元瑞元瑞拒弗受客謂元瑞曩湖上之役胡以異茲元瑞徐曰莫生者庸詎足校也仲淹司馬公介弟吾儕當愛之以德獨奈何成人過耶客乃服元瑞自髻髻厭薄榮利餘子女玉帛聲色狗馬服玩諸好一切泊然而獨其嗜書籍自天性身先後所購經史子集四萬餘卷手鈔集錄幾十之三分別部類大都如劉氏七略而

加詳密築室三楹貯之黎惟敬大書其楹曰二酉山房而屬予爲記
且夕坐卧其間意翛如也恆自笑蠹魚去人意不遠又謂我故識古
人恨古人乃不識我其托尙如此好稱說前輩風節嘗怪其郡若梁
劉孝標之介唐駱賓王之忠而世僅僅以文士目之當由作史者盲
於心故且史第知有狄梁公宋廣平賢皆頰首而從周祿將以視賓
王何徑庭也上之采風使者蘇君禹君禹雅敬信元瑞趣下其事賓
王得以鄉賢祀郡城而孝標亦暴顯元瑞所著詩有寓燕還越計偕
巖棲卧游抱膝三洞兩都蘭陰畸園等集二十餘卷詩藪內編外編
十二卷他撰述未行世者有六經疑義二卷諸子折衷四卷史藪十
卷筆叢十卷皇明詩統三十卷皇明律範十二卷古樂府二卷古韻
考一卷二酉山房書目六卷交遊紀略二卷兜玄國志十卷酉陽續
俎十卷隆萬新聞二卷隆萬襍聞四卷駱侍御忠孝辨一卷補劉氏
山樓志十二卷蒐輯諸書有羣祖心印十卷方外遐音十卷考槃集
十卷談劍編二卷采真游二卷會心語二卷類萃諸書有經籍會通

四十卷圖書博攷十二卷諸子彙編六十卷虞初統集五百卷蓋生平於筆硯未嘗斯須廢去元瑞壯未有子邇始舉二子戊子冬復以按察公命赴公車至瓜洲而病病積久不愈慨然曰吾其殆乎謂余知應麟者唯子幸及吾之身而傳我使我有後世後世有我也

王子曰元瑞年三十有八耳神情而意甚舒卽偶犯霜露何恙不已而慮至此也夫以元瑞之生僅三十年而著作充斥乃爾過此以往所就當何如耶元瑞於他文無所不工績學稱是顧不以自多而所沾沾極詩彼固有深造也元瑞才高而氣雄其詩鴻鬯瓌麗迥絕無前稽假以年將與日而化矣至勒成一家之言若所謂詩數者則不啻遷史之上下千載而周密無漏勝之其刻精則董狐氏韓非子也吾長於元瑞二紀餘姑爲傳以慰之且謂元瑞子後當竟傳我

少室山房類藁卷一

續金華叢書

漱水胡應麟明瑞著

樂府一十八首

擬大明饒歌曲十八首

有序

夫鼓吹饒歌之作肇自有熊所以象成功昭盛美凡聖王受
天明命摧陷廓清之烈非此亡以被諸聲容粵自商周以征
伐定天下一時播告之章弗可覩已漢饒歌十八曲其辭迄
今尚存雖文義譎脫難以盡諧歌中之辭亦匪專爲武功而
設至味其音節隱然發揚蹈厲之風視漢諸古詩優柔馴厚
者迴絕不倫則饒歌所由作可知已兩漢而下魏繆襲吳韋
昭晉傅玄宋何承天唐柳宗元代相擬襲趙宋無聞則皇明
宋濂氏嘗追述之尋諸家制作卽風格詞藻未能抵掌西京
一時可頌之績固咸取以被諸樂章矣高皇帝提三尺起淮
甸驅狂虜而遏絕之大荒之外此其勳德巍巍亡論湯武卽

軒轅氏不無遜心獨饒歌之作諸文章家往往缺焉間一二
僅見而辭義寂寥音節迂緩未足以揄揚大造垂示無窮夫
魏吳偏閏唐宋下衰繆韋何傳於騷壇未槩作者彼且黽勉
步趨以自侈一時殊際焉明臣子目擊高皇帝震古無前之
偉樹以安享二百禩之太平卽草莽山林疇匪帝力而默默
終身不能效一辭之贊甚非所以效康衢擊壤野老細人之
義也應麟不敏呻吟佔俚餘二十年蠡海管天頗測毫末謹
按我聖祖發軔之初以迄於四方底定之日敘次其事爲大
明饒歌曲一十八章誠知謏聞謏識上不足以鳴昭代之鴻
庥下不足以驚西京之遐軌以較唐宋諸家庶幾近之綴屬
旣成不忍焚擲爰錄笥中附諸康衢擊壤之末異時鴻生碩
彥製作迭興盛演歌辭登諸鼓吹俾聖神勳德永揭千秋此
或爲之嚆矢云爾饒歌本二十二曲其四曲亡魏吳所擬僅
十二曲說者咸以十曲仍用舊名然其辭亦不復傳何也今

止據存者十八曲擬之考諸家詞惟繆韋傳常被施用承天
宗元輩率私作之以備異時采擇者而憑依名義流播迄今
故敢竊取其例焉

黃河清

元至正末黃河清大聖啟運協符載闢宇宙爲黃河清第一
黃河清聖人出應昌期誕至德着戎衣奮三尺靖四方建都邑干戈
偃弧矢戢統華夷主社稷神與鬼咸受職腥膻掃燭火熄維大明照
中國萬千禩與天一

右黃河清二十句句三字

鳳之翔

高皇帝起濠上追王迹肇今名爲鳳之翔第二

鳳之翔在濠梁義師起帝網張二十四將驅天狼兵鋒所指定四方
薄海內外以莫不來王威加六合返舊疆徵歌悉發諸兒郎復彼人
民世世無有所與爲我沐與湯擊筑大風雪飛揚千秋萬歲樂未央

右鳳之翔十一句四句三字六句七字一句九字一句十五
字

攬羣雄

龍飛淮甸豪傑景從得大將達遇春等二十四人以一海內
爲攬羣雄第三

攬羣雄盜如蝟大聖握符起淮汭與神爲謀蓄鋒銳提三尺劍驅海
內驅海內攬羣雄真人出天下同四方六合咸景從如風從虎雲從
龍汎掃大漠如飛蓬扶桑瞳瞳朝日紅驅海內攬羣雄

右攬羣雄十五句六句三字八句七字

克建業

師濟采石長驅金陵定皇畿繫萬國爲克建業第四

克建業定皇畿皇畿定舉義旗天兵百萬任所之東吳南漢西蜀七
閩六詔從風靡天下大定一戎衣

右克建業六句四句三字二句七字一句十三字

婺歸德

大駕東征首下寧越婺女之郊聖蹕駐焉爲婺歸德第五

天兵十萬下東國婺以先寧駐皇蹕景星熒熒耀城邑我戰則勝攻則克四海從靡弗一勢如破竹烽燧息天命曷歸歸有德

右婺歸德七句句七字

四友

兵入浙聘劉基宋濂等四人置帷幄中爲四友第六

於維文王是親四友疏附後先以翼元首峩峩高蹤異代曷有天威是臨匍匐奔走猗與聖祖廣延羣雄如天如海爲萬物宗王師所向六合景從爰率車徒以定浙東浙東底平大統未集蚤作暮思思布文德曰基曰濂曰琛曰溢玄纁奕奕交布東國曰四先生論道經邦坐而弗名匡朕弗遑嗚呼盛節慶流無疆德六五帝功百三王

右四友三十二句句四字

戰鄱陽

偽漢陳友諒率徒數十萬來抗高皇帝躬督大將達遇春等

鏖戰湖口滅之為戰鄱陽第七

明日大戰戰鄱陽簡師料徒百萬強烈風吹沙湖水揚煙焰漲天焚
大航三十六將死康郎再戰湖口殲餘皇我舟膠沙敵尙強疾呼奮
臂來衝撞鯨鯢蔽空雲日黃拍江巨浪何茫茫如血鉅鹿尸昆陽維
天命我明車輪碎螳螂百矢定邊背若芒一矢貫睛諒死亡諒死亡
理出降威加四海莫不來王

右戰鄱陽十九句二句三字二句四字二句五字十三句七

字

盤門入

張士誠據姑蘇命將覆其巢兵不血刃為盤門入第八

盤門入士誠泣前歌後舞大師集兵不血刃下城邑誰其帥者公魏
國歸市弗止塵弗易萬姓懽呼頌皇德二敵既殲皇之士東極滄溟
南亘楚長驅入中原孰敢余阻

右盤門入十句二句三字七句七字一句九字

降谷珍

島夷首亂元末懾我大威束縛待命海口爲降谷珍第九

方谷珍起盜藪乘元之亂竊據一方地如斗耗金幣大官酒海上時
時飛且走如鬼如蜮雞與狗大明當空燭九有舉宗乞命竄海口帝
憫其愚印加肘以較羣雄最小醜

右降谷珍十一句四句三字六句七字一句十一字

七閩

陳友定保閩粵師縛之爲七閩第十

七閩保岩阻連亘皆山梁友定據其巢負固如金湯我皇命將諭諭
以開茅疆自謂故元臣負義不肯降王師十萬下戈船逐長江兵入
如破竹如虎吞羣羊委身繫尺組支體磔分張自謂故元臣守節甘
喪亡大都以淪覆誰爲招國殤

右七閩十八句句五字

維中國

大將統六師北鄉儒臣廉諭檄中土華夏擴清為維中國第

十一

維中國帝王所自立瓊裘宅蒙古天地黯無色天重開地重闢扶桑
熒熒日月出照八荒爛九域芟夷禍難四海一神龍夾助正統集帝
愍腥風染中國詔下大將軍達副將軍遇春提兵九十六萬戈鋌甲
胄如浮雲命詞臣廉草檄諭彼中華民長驅入河洛壺漿箠食夾成
羣

右維中國十六句五句三句三句五字四句七字二句十一

字一句十二字一句十三字

大都走

天兵入大都故元主妥懽帖木爾棄社稷奔為大都走第十

二

元都平四海清神鬼受職蠻夷庭列大藩置神京汎掃腥膻混一區

寓再造華夏開文明

右大都走六句四句三字一句七字一句十五字

擴廓

虜規復故都師擣之大戰於定西古城夷其部落王保保絕
塞遁爲擴廓第十三

察罕起元末舉代推鷹揚天命去勝國剗刃爭戰場維廓擴察罕子
復良下益都伐洮陽驅兵出沒觀以望帝三諭彌陸梁執囚我行人
怒臂如螳螂命大將統武驍北征隴右一戰搗其巢搗其巢萬騎突
至如風颺賴傅頴公却前茅兩軍就舍不得交夜分刦營足納一靴
身騎驪馬逃驪馬逃絕大漠我軍四十萬勝負互相角巨網漏吞舟
竟死蕃部落帝稱好男子維廓擴

右擴廓二十六句七句三字十句五字一句六字四句七字
二句八字一句九字一句十三字

昇面縛

蜀阻聲教璟諭不從大兵入成都虜明氏母子歸爲昇面縛

第十四

昇面縛出成都母子啞啞啼路途父旻玉珍一目枯貪饕亂亡起雄
圖不久身殉留遺孤大明御寓驅羣胡屢使遣諭如追逋獷兵悍將
驕相扶驕相扶守瞿塘帝命頽國公東甌王伐山通道開戰場直搗
階文潰腹心腹心潰肝膽亡母子輿櫬大道旁昇也肉袒仍牽羊侯
以歸義戒殺降高皇帝德洪虞唐高宋武如豺狼

右昇面縛二十句六句三字十三句七字一句八字

北征

中夏略平分命諸上將耀兵沙漠虜庭一空爲北征第十五
明受命海宇一殘元餘孽負固不恭保其窟團結犬羊以俟我鬻隙
爲我子孫慝皇帝遐思勿姑息乃眷西顧以北征桓桓大將統兵億
萬犁其庭犁其庭虜膽落單于遁絕大漠

右北征十二句六句三字二句七字二句十一字一句十五

字

納哈出

宋國公出塞降虜大酋悉收其眾二十萬餘人爲納哈出第

十六

納哈出居金山二十餘萬眾虎視一何耽耽帝命上公馮統兵出全
燕天威所震懾虜騎不敢馳虜弓不敢彎二十餘萬眾一時赴長安
捉金伐鼓壯士權築三受降玉門關

右納哈出十三句二句三字七句五字一句六字二句七字

六詔

元孽負固滇中命沐英等督兵平之永鎮其地爲六詔第十

七

六詔天西南惟滇號最鉅殘元歷數盡遺孽猶虎踞帝愍絕塞民使
命馳風塵彼昏不奉詔虔劉我信臣皇赫斯怒命黔寧滕衝巨舶浮
昆明昆明水涸殲長鯨碧雞金馬入我版圖四海平

右六詔十二句八句五字三句七字一句十一字

受天命

四方底平九域以寧百千萬禩統我皇明爲受天命第十八
受天命定四方干戈偃鉄鉞藏帙大武駕成湯媿軒轅儷虞唐擴地
萬里居中央整齊萬國開明堂漢唐宋晉隋諸邦絜功比德如蝸蟻
萬八千歲永無疆

右受天命十三句八句三字五句七字

少室山房類藁卷二

續金華叢書

澗水胡應麟明瑞著

樂府三十首

漢鐃歌十八首

朱鷺

朱鷺下漢道昌一雙羽翻雲中合沓而飛翔合沓而飛翔在我庭戶
以建華鼓導大輅魚魚雅雅詫彼行路朝食沆瀣夜濯風以露應期
出世所慕五帝三皇巍巍福我祚

艾如張

艾如張張四維擊高鉦懸大旗戈鋌甲冑光陸離千靈從七校移虜
人雜沓冠以皮臂蒼走黃當路歧南山有虎豹北山鹿麋狐兔若丘
山縮足不敢馳我欲上天天門九重我欲入淵血肉餒蛟魚龍王者
合三驅百獸一一歸我攀龍不見青冥冥冥者鴻聳六翮乘長風遊
赤霄入無窮雖有矰繳羅網將安庸

思悲翁

思悲翁氣結不能言見長翁爲娶婦思得奉晨昏白頭以團樂婦惡如豺狼入門作災患牝翼鳴前庭舉室愴以煩知交各各縮舌親戚斷往還我有壺漿翁饑不得食我有裳衣翁體不得完思悲翁氣結不能言我欲訴上帝天門九重入以難我欲訴司命司命徘徊以盤桓念欲以高飛無羽翰以負翁去體毛何摧殘不若城上烏反哺翁殘年思悲翁氣結不能言安得天雨雹霹靂震長夏雷霆半空下永永戒來者

翁離

舊辭缺今據補之

翁離趾中可築室何用葺之桂若蘭翁離趾中可築宮何用塗之椒以檀脩竹夾廣除一何檀欒千乘萬騎續紛哉往以還左長楊右甘泉汾陰後泰畤前黃鵠高飛極雲天詞臣獻賦陛下之壽三千年

上之回

上之回祀甘泉金支颺翠旒旋雨師後風伯前鼓鐘管吹聲何填駢

東達扶桑南逮于闐西逕流沙北訖祈連天出景星地產醴泉報慶
成致精虔肅雍哉愴以嚴五帝三皇享億萬斯年

戰城南

戰城南日無色壯士長征死願作烏鳶食請謂烏與鳶壯士死國家
委身喪其元汝食其肉一胡忍且殘世有大豪元惡巨奸殺公吏探
赤丸暴戾恣睢膾人肝一旦禍機發橫尸道傍血如流泉腐肉如丘
山汝胡不食甘此忍且殘請爲烏與鳶答君子言世有大豪元惡巨
奸司命不敢錄司敗不敢拘司隸不敢糾彈十九老死牖下子孫貴
盛冢墓象祈連彼雖有肉血我安得淪壯士不自惜委身殉國家喪
其元我固當得食彼復何言

巫山高

巫山高高望不可極日月蔽虧雲雨出入有美一人日維神女朝爲
行雲暮爲行雨冷然入余夢貽我以翠羽鬱陶乎余心將以疇語將
舍余國都以往從女朝朝暮暮爲雲爲雨

上陵

上陵一何崔嵬宮殿若雲屯觀者爲徘徊門有車馬客駕言上陵廻
千乘萬騎宵行烈風雷我欲遐征憇望金銀臺封泰山禪梁父登日
觀觀蓬萊蓬萊東見朝旭芝草藜生醴泉滿谷七十二家著編錄

將進酒

將進酒乘乘黃列鼓吹鳴笙簧齊姜楚姬列兩傍衛女秦娥左右以
成行挾安陵戲龍陽擁長劔珮琳琅繽哉紛盈高堂烹大彘炙肥羊
五音和入珍良天瓢甘露臣以嘗千秋百歲逍遙以徜徉

有所思

有所思思美人美人渺何許大海天東南曷不往從彼游路途險且
艱弱水不容舟三山鬱嶺岫宮闕冠巨鰲遙遙極青天美人在其上
三山高以寒我爲釣巨鰲截竹爲長竿持竿坐滄海大水何漫漫巨
鰲牽不動但見一雙鯉魚遊墮青雲端呼童剖此鯉中有美人尺素
翰前有長相思後有勸如食徘徊感此意躑躅不能言

雉子斑

雉子斑雉子斑一雄一雌抱子田野邊雄飛摩天去不還孤雌養雛
寄草間養雛寄草間乳哺一何艱夜不遑寢晝不及飡毛羽旣長成
五色麗且鮮一鳴舉世驚一飛上冲天回頭顧視我母六翻何闌刪
老病條已至慊慊向重淵有子不得養慟哭摧心肝有子不得養慟
哭摧心肝

君馬黃

君馬黃臣馬蒼飛軒蹀躞大道旁旁人顧見臣馬以莫不謂良一朝
中消下明堂君馬入天閑意氣何揚揚臣馬老伏櫪伶俜瘦骨朝逐
水草暮逐斜陽背負鹽車以西上太行路逢伯樂造父王良停車振
策爲我彷徨念欲剪拂我以登明堂嗟筋力已盡莫能騰驤長鳴短
號斷絕中腸

芳樹

芳樹芳樹揚春華結秋實東風歷亂而飛揚容色在朝夕美人坐高

堂兀兀愁蛾眉君心爲他人治艷能幾時春華詎能久秋實那可期
普天之下悠悠疇非輕薄兒班姬與陳后解事一何遲黃金買詞賦
徒爲世主疑不見芳樹枝榮瘁各有時端居任大化何用戚戚鬢蛾
眉

聖人出

聖人出明光宮萬乘千騎升回中望祀天地禋於六宗百神來享以
莫不肅雍肅雍雍雍四方同風唐虞之世比屋皆可封浩浩大化與
天地無終

上邪

上邪我與君輸肝委膈他人那得聞急難各相護救決絕妻子如浮
雲中心耿耿金石百年以爲鄰巢由撫六合堯舜下閭闔山崩石爛
河枯海水竭十日竝出天地裂我與君好永不絕

臨高臺

臨高臺望長安飛甍畫棟嵯峨峭崿而噴岨蒼龍九旂限重關我欲

謁天闈一覲上帝顏手持長生藥以奉心所權上帝肯聽臣億萬千
斯年蒼龍九旂限重關限重關使我欲進心茫然臨高臺望長安撫
膺三嘆行路難

遠如期

遠如期遊四方北碣石南瀟湘西太華東扶桑鑿混沌竅燕中央飲
則食兮樂而康以尋列仙拾金光飛翔八極行七襄馳驅絕真觀大
荒千秋萬禩壽未央男兒墮地桑弧蓬矢射四方安得老死一丘局
促若轅下駒守故鄉

石流

石流南山有石北澗有流石何齒齒流何湯湯石以枕我流以漱我
腸幽蘭哉夾岸芬以芳芬以芳順風揚彼美人兮天一方安得寄此
永永長相望

補蜀漢饒歌十二首 有序

炎精既缺海寓三分昭烈以漢室宗親親任武鄉君臣一德

託孤寄命比隆伊周自兩漢以還大統故當以蜀爲正干
氏抗言武鄉不死禮樂可興識者咸謂不誣顧漢氏而下魏
吳晉各有饒歌以播揚功德蜀反缺焉蓋武鄉身任復漢之
責魏吳未滅夙夜皇皇惟誓師鞠旅東鄉是圖舍是而播告
聲歌彰明得意此天下旣平之事非枕戈待旦之日所暇爲
也又蜀之文人時尤不競譙周郤正等輩槩之詞賦咸匪所
長亡論武鄉未暇卽欲有事焉未有可以肩草創之能洪潤
色之寄者也惟是魏吳製作流傳迄今才流藝士簧鼓筆端
動以昭烈武鄉夷諸僭竊順逆邪正鬱而弗彰余甚憾之昔
陳壽三國帝魏先晉紫陽一正其謬稱快千秋不佞佔俚詞
場餘二十載于樂府雜調頗覩一斑每讀鼓吹饒歌至繆襲
韋昭傳玄諸作不勝搯腕至欲鼓而攻之噫彼各自尊其主
勢則宜然百世之後是非大明而操管握觚之儔從事樂府
惟齊梁月露冶艷相沿迄未能一厝意於此余則何敢以謙

讓未遑也爰效繆韋諸體爲蜀漢鐫歌曲一十二章上以著
昭烈間關裁定之績下以明武鄉夾輔盡瘁之忠卽藻繪方
之諸家未當魯衛而理直義形據事陳詞羣嗥自廢忠臣志
士之憤或賴此其一雪矣夫

宋無鐫歌宋景濂嘗追補之惟後漢獨缺云

帝車見

昭烈甫髻舍東南產奇樹五丈餘童童若羽蓋望氣者咸屬
心焉爲帝車見第一

帝車見涿鹿墟童童立五丈餘千靈衛七聖趨颺金支翼翠旗兩師
道風伯驅氣如龍殷里閭真人起握斗樞奠漢鼎撫皇輿炎精曜火
德噓億萬載帝方隅

顧隆中

先主屯新野三顧諸葛亮於隆中明良之盛實絕千古爲顧

隆中第二

顧隆中一顧再顧三顧何從容千秋載觀明揚風君臣契合魚水同

莘野幣交湯匪躬渭川一見羅非熊何如三顧勤隆中惜哉炎燼噓
殘虹創業未半中道終三分鼎足寧稱雄

克老瞞

曹操取荆師百萬而東命諸葛亮諭權發兵大破操於赤壁
爲克老瞞第三

克老瞞厥功不可量瞞挾天子令四方以暴如虎貪如狼既定荆州
下長江併兵八十三萬強克威所指橫以張所觸者碎當者亡遣軍
師亮諭孫權權奉命發兵助我屯江干桓桓烈炬戰艦轟將士大呼
衝敵堅賊兵百萬屍如山操走烏林四海安

權進妹

旣破操屯荆權懾大威詭媒締好爲權進妹第四

權進妹託同仇外戚內疎諧孫劉包藏禍心蓄愆尤牀帷甲第圖淹
留戈鋌矛戟紛相求帝握大機與神游與神游眾叵測劉郎權孫郎
泣周郎唇乾口燥呼不得以頭搶地長太息千秋齒冷笑吳國

史稱瑜合

權離間羽飛等臨
歿復以爲言云

定兩川

成都底定遂圖漢中馘淵驅郃魏操昆奔爰建大號卽帝位
爲定兩川第五

定兩川皇圖赫赫帝業安成都破竹萬姓懽懽壺漿夾道食以簞西指
定軍奪前山夏侯來爭馘斬淵馘斬淵眾大崩郃也棄馬亡心魂操
懾首鼠抱頭奔抱頭奔兩川一順天應人卽皇帝位萬國新

討漢賊

羽破襄圍樊風動華夏操震怖欲奔權帥賊黨蒙遜襲荊州
漢事遂壞先主親征權軍於猇亭爲討漢賊第六

討漢賊屯猇亭屯猇亭皇赫斯怒以親征嗟關羽率眾圍樊城七軍
夜渰師徒崩操懾大威如雷霆賊權惴惴怖且驚謀呂蒙逞
虐焰乘奸克爲鬼爲蛾蠛與蠖遂亡荊州喪大功踰月蒙死屍流蟲
皇赫斯怒離巴中離巴中以親征破枳歸震夷陵蒙賊旣死遜賊復

興嗟嗟昊穹漢事壞垂成

渡瀘

丞相亮受遺輔政五月渡瀘羣夷格心式歸大化爲渡瀘第

七

渡瀘師徒一何勞五月盛暑深入不毛託孤寄命予惟伊咎陶勞實
在予子曷敢逃五月盛暑深入不毛獲彼大酋以令羣豪七縱七擒
俾返其巢眾懾天威永戴大朝振旅而還徒御弗號雍雍旆旌肅肅
羽旄文德誕敷爰格有苗千秋兩階載覩唐堯

祁山

丞相亮將圖中原上表出師三郡響應魏人震恐舉國奔命
爲祁山第八

祁山出漢賊驚創業未半先帝崩丞相匪躬夜弗寧上表帥師東鄉
征卒徒十萬如風霆潛張箕谷爲疑兵身率大眾屯街亭三郡響應
如流星惜哉馬謖毀垂成載出軍王雙梟郭淮遁拔武都陰平魏大

震

馘張郃

司馬懿帥眾來攻命魏延等逆擊大破之馘其將張郃於陣
魏人喪氣不復出爲馘張郃第九

馘張郃在鹵城蜀人歡忻魏震驚魏兵百萬乘蜀營司馬披甲仍先
登我師一出殲長鯨卒徒賈勇懿大奔積甲三千若丘陵司馬匍匐
亡旌旄賊徒郃追木門萬弩射郃褫郃魂馘之不異雞與豚桓桓入
陣孰敢嬰所當者破擊者平如湯如武天下無敵十一征

蜀如虎

賊堅壁不戰使以巾幘遺之懿輦蹙受焉魏眾咸曰公畏蜀
如虎奈人笑何爲蜀如虎第十

蜀如虎師甚武熊羆十萬下天府仁義禮樂爲盾櫓奸雄閉穴氣銷
沮甘受巾幘呼老姥嗟嗟懿如鼠亮如龍蜀如虎

五丈原

師上五丈原畊者雜於渭濱三代節制之師至是再觀為畊

渭濱第十一

五丈原駐三師三代以還僅觀茲濱渭雜畊軍無私芻糧百萬饒餘
賞中原克復功須斯功須斯定關洛滅魏斬獻梟懿殛權混一四海
興禮樂

餘威懾

大星殞亮卒師魏眾來追我兵反旆擊之懿魄奪反走為餘

威懾第十二

餘威懾走仲達胡天弗弔喪諸葛大星煌煌殞天末我師反旆喪不
發魏人懽呼夜來躡鳴金展幟雷電掣懿也狼奔膽欲裂千秋壯士
贊諸葛死諸葛走生仲達

少室山房類藁卷三

續金華叢書

漱水胡應麟明瑞著

樂府三十首

擬漢郊祀歌十九首

練時日

練時日候陰陽郊圉丘祀明堂君哉蒿薦上帝靈來思思弗替靈之
駕六飛龍天門開誅九重靈之旗翼神魚乘罡風載行厨靈之裳曳
三光爛虹霓象玄黃靈之珮建蒼玉鏘大虛答窮谷靈之下赴閭闔
洋洋如走六合靈之歆稷用登告特牲報維馨靈之留駐蒼虬紛萬
舞結網繆靈之往遺蚡蠻儼若思企餘想奏咸池舞韶箭續紛哉靈
之樂臣八荒馭九夷歲千億靈之貽

帝臨

帝臨中央以運四方苞孕萬彙協和三光厥服載黃厥數載五克配
上帝維我后土皇皇后土德周遍咸百穀告成大有斯年

青陽

青陽載臨萬物敷榮勾萌甲折蠢動含靈雷乃發聲雲行雨施大造之仁品彙華滋跂行喙息繁以疇息東皇太乙莫匪爾德

朱明

朱明燁燁品彙嘉悅鮮潔齊均以莫不達祝融司造熏風維時皇人法天南面象離萬物相見茂昭大夏昭告昊穹百神來下

西顛

西顛金方蓐收是秉卉木變衰霜露淒緊旣蓂旣樵我稼我苗實顛告成碩彼東郊爰馨黍稷殷薦上帝于億千年永矢弗替

玄冥

玄冥水伯載司寒沍殞霜殺草昆蟲閉戶北風宵厲飛霰晝零不脫水涸雷蟄無聲歲運旣徂陽和在候萬寶旣成敢告明后

維泰元

於維泰元象帝之先綱紀三才遍周八埏皇皇天地疇闔疇闕於維

泰元潛運無極風雨雷露維日月星咸若其時克順克成胎卵濕化
生育孳遂滅除灾兇增長福艾四序旣宜八表旣安孰司其柄於維
泰元嘉牲燁燁陶匏涓潔聿來駿奔靈爽斯達以莫不虔以莫不馨
元化網緼泰階底平

天地

維天維地協尊並巨嘏余一人六合和豫皇皇齋宮穆與神通臣隣
景從肅肅雍雍報圜丘兮祀后土千童羅列謳且舞曳擊笙鏞鳴琳
球神如有知儼來遊大小諸秩咸敬厥職整齊服章駿奔翼翼羣公
秉德毋怠毋忽大君恭默式於列辟降天神兮下地祇朱雀爲駕蒼
龍旗勾陳前導屏翳馳長劍幼艾紛陸離流商刻羽歌咸池神飈擊
轂河宿移簫韶九成鳳來儀皇人萬壽登維祺

日出入

日出入暘谷扶桑間一何迅且疾百年若電光四序如風颺祝融驅
火輪葶收乘斗杓羲和掣神鞭玄冥扇狂飈安得駕六龍遊遨遍八

北室山房卷三
極長生不復死永永天地畢

天馬

天馬來自渥洼度月支逕流沙天馬來以蹠躩骨權奇汗維血天馬來驥爲友喪驪黃牝與牡天馬來躡浮雲日千里空而羣天馬來服帝閑從法駕鳴和鑾天馬來兆有德瑞萬方景四國

天門

天門開闢九重上帝居百靈從瑤爲臺璇爲室樞紫貝牖金碧吐望舒宅曜靈建雷鼓樹霓旌左蒼龍後白虎守飛廉衛玄武靈光被六合周燭萬景洞九幽勵精誠薦嘉藻永如期錫難老靈爛爛兮載揚光清飈激雲下羽旛牽牛織女行七襄蛾眉稚齒紛君堂靈目成兮悅而康合祝敵兮陳笙簧天門呀然豁扶桑雙翼乘風朝紫皇揖西王母攜東方食蟠桃實乘乘黃周歷八紘度九域吐納眞精戲無極

景星

景星見祠神鼎載出煌煌赤文以播有德經緯虹霓屈蟠蛟螭魑魅

魍魎莫能逢之我鼎爰獲我號爰建以祀汾陰光我大漢巍巍夏后
錫此寶勞閱歷商周肇見我郊敢告上穹肆逮下土作樂象成百獸
率舞享帝享親以莫弗歆甘露是凝昭我萬齡

后皇

后皇降休介我景福以玄以黃黼黻章服靡邇弗洽靡遠弗蒙億萬
兆庶視此成功

齋房

齋房三秀柯葉九莖煜煜皇皇太和是蒸亭雲爛霞嘘日月精句曲
之天金液玉英羽駕罡風八翼上征春曲靈苗維王國禎於鑠我皇
禩億萬徵

華燁燁

華燁燁黍載馨延庶旄駐翠旌神之來七聖俱虹爲馬蜺爲車神之
來百靈萃風爲裳水爲佩神之來薦嘉豆八珍輻眾芳藜神之來肆
長筵雷大鼓鳴鈞天何以休神之留赤鳳至黃麟游何以豫神將遇

慶雲見甘雨澍躡鹿盧綦星辰佐昊穹佑下民酌斗杓和沆瀣揄長
蛾擁幼艾日馳精月揚光爛昭昭樂未央崑崙墟瀛海溼以余歸浩
無際

五神

維五神五岳精德盛大包羣靈佐東皇贊太乙報圭璋達琮璧奠桂
醑以椒漿牲肥腍夜斯皇女巫進姪以麗迴雲旃駐霞幟神偃仰以
徘徊歷明堂昇帝臺維光華嘏大漢年歲登永嘉薦

朝隴首

朝隴首遊白麟顯光華

字說磨之來也光華不可正視從鹿從文

輔一人靈昭昭慶萬國

肇皇仁祗帝德八蠻共四夷王母怠荒納嘉祥嬉余數服余輅浴和
風沐甘露左蒼龍右紫鸞文狸後赤豹前圖爾形輯爾瑞五千曆視
茲歲

象載瑜

象載瑜粲六牙至萬里自流沙入天閑服輿阜扈法駕彰大造翩翩

哉赤鴻來超虞羅翔玉臺翻五文麗以鮮銜靈芝嘒醴泉兆嘉祥視
景福八荒來四夷服

赤蛟

赤蛟下蒼龍遊靈已醉不可留赤蛟翔彩虹馭靈欲歸不可駐靈之
逝觀玉臺戲闋風宴蓬萊靈之昇上無極挾宇宙傍月日靈般般亦
享余下神雀降天厨靈般般肆余佑億萬祀永以壽

蒲梢歌

天馬來兮涉玉門服天閑兮朝至尊駕余車兮上崑崙閱萬國兮超
乾坤

太乙歌

貢驊騮兮自太乙若滅没兮亡其一以龍爲駒麟爲匹歷塊萬里昭
帝德

靈芝歌

孕三秀兮毓靈芽承月精兮映日華爛輝光兮發雲霞服紫莖兮嘒

胡麻乘赤霄兮上無涯

琴操十一首

龜山操

龜之峻嶒兮望魯之疆
龜之憑陵兮蔽魯之邦
遲遲余行兮載贄於
筐余懷以怛怛兮胡爲去父母之鄉

猗蘭操

汎汎崇蘭在彼空谷以芬以芳
達於平陸達於平陸大國之香
薄言掇之以遺明王以遺明王
疇適逢世歲月行暮芬芳將逝
芬芳爰逝羌不可留
怵怵我心曷維其憂

履霜操

嗟嗟皇考放余於野兮凜凜嚴霜
雨雪交下兮雨雪交下
復弗可留兮念欲自明
我維君憂兮我維君憂
逝將安適兮世豈有茲無父之
域兮無父之域
余曷以居兮熒熒上天
罪實在予兮

殘形操

夢之憧憧兮厥形維狸形之蛩蛩兮胡首則遺茫茫吉凶疇尅我
期皇皇昊穹兮庸豁我疑

雉朝飛

雉雊於田兮維雌則隨暮而無妃兮入而安歸憂心忼忼兮將以告誰
援琴而歌兮以寫我悲

采芝操

煌煌紫芝三秀五莖鬱鬱崇岡龍嵒眇冥爰卧其巔爰掇其英顏色
麗鮮以敷以榮身輕翼舒遊六合外駟馬高蓋翳以疇賴巢哉由哉
寤言弗猜唐哉虞哉亦已焉哉

秦女操

穀之襜襜兮可裂而朽兮屏之巖巖兮可越而走兮劒之嶢嶢兮可
捍七首兮

八公操

煌煌八公下帝庭兮貽我大藥登遐齡兮嬰兒姪女相和鳴兮飛翔

少室山房類稿卷三
九垓羽翼成兮金支翠旂夾路迎兮萬年不死居曾城兮俯視六合
徒營營兮朝生夕枯如蠓螟兮

思歸引

維鹿有由兮維鳩有仇兮爾徒余囚余寧爾留兮

別鶴操

羽翼雙飛兮中道當乖汝翔安適兮余居易諧彼伎則害兮爲家庭
灾汝淑則慧兮曷明余懷

牝晨操

維牝無晨兮爾胡以鳴兮維爾之鳴兮家胡以寧兮牝兮鳴兮晨兮
家兮庭兮忤兮營兮雷兮霆兮

少室山房類藁卷四

續金華叢書

漱水胡應麟明瑞著

樂府二十五首

王子喬

王子喬玉笙霞珮長飄颻王子喬玉笙霞珮長飄颻下遊來王子喬
緜山萬桃花白日行逍遙倏忽上浮雲騰身還九霄足躡一雙鳧虛
空以遊遨顧視世間人勿復勞相招蓬萊之水清且淺金銀樓殿何
岩峩三神之山連巨鰲仙聖億萬計驂鸞跨鳳紛紛而來朝蒼龍爲
我車烏鵲爲我橋道逢王方平拍手彈雲璈麻姑十八九紅顏髮垂
腰要我擘麟脯進藥長生瓢顧視世間人勿復勞相招今上神聖海
晏河清曷不跨雙鳧來覲漢家朝凝圖奉籙壽與天迢迢下游來王
子喬

桂之樹

桂之樹桂之樹輪囷偃蹇寂寞山之阿山阿者誰被薜荔帶文蘿淹

留桂樹枝以婆娑以婆娑歲月冉冉而蹉跎攀援桂樹枝行且歌瞻
彼桐栢之山桂樹叢生其上高嵯峨高嵯峨吾欲采其實陰其葉憇
其柯白日將暮熊羆虎狼夾路當奈何白日將暮熊羆虎狼夾路當
奈何

猛虎行

南山有猛虎白額斑斕而錦文南山有猛虎白額斑斕而錦文目睛
鑠雷電齒牙決浮雲出入乘風颺威加百獸熊羆豺狼狐兔惕息莫
敢與共羣一解山頭絕樵采山底無四鄰終朝攫取行旅食黎氓婦
女小兒骨骸若丘山腥穢不忍聞二解謂虎汝胡不仁胡不學彼騶
虞鳳與麟百獸有恆食胡汝好食人汝胡太不仁吾將上訴汝訴汝
司命君三解啗司命君不汝異傳汝角張汝翼礪汝爪距鋒以銳俾
汝飛而食人萬里外四解食人以足天道好還忽遇洛陽三河少
年賁戎發機下莊奮拳飲飛鼓刃裴旻控弦擊鼓鳴鉦張網樹旗有
角焉振有翼曷飛割裂其肉寢處其皮以首承溺爲百獸嗤永戒後

人爲惡勿長爲善勿疑彼不余信請視此詩

烏生八九子

峩峩秦氏高樓桂樹輪囷出雲間上有一雙頭白烏毛羽何摧殘啗
彼頭白烏生八九子養雛坐樹端八九子乳哺亦誠難朝不得食夜
不得食八九子羽翼以長成各各飛去忘來還啗彼頭白烏空腹坐
樹端饑餓頓欲死淚下如流泉啗彼秦氏少年子怒激壯士肝白玉
爲瑯弓黃金爲彈丸一發中羣雛魂魄飛上天八九子魂魄飛上天
啗彼烏不反哺誰當憐

西門行

綦隆世化日舒玉尊肴醴羅前除東隣子燕趙妹清歌妙舞揚羅襦
賢豪過駟馬車良辰日吉心相娛人命無百年日月同斯須胡爲自
約束悵悵常獨居豈無仙人王子喬駕六飛龍遊太虛豈無仙人王
子喬駕六飛龍遊太虛天地會有終千秋萬歲後仙聖同凡愚不如
命我友撞鍾雷鼓鳴笙竽

東門行

出東門步且吁時世混濁難共居我欲乘長風東遊扶桑西瑤池揮
首向容城億萬不相疑歸來告妻子牽衣躋足長歔歔長歔歔上有
垂白親下有黃口兒孔雀東南飛十步五步不相離君今獨行安所
之不如守窮巷雞鳴狗吠相因依不見伯夷叔齊采西山蕨薇榮名
被百世難等夷

順東西門行

歲行暮時既昏設我肴醴開玉尊樂親故延嘉賓軒車雜沓徒在門
列五鼎羅八珍甘嘉溢口呈芳新飲麻姑招洛神擘紅虬脯羞黃麟
琴瑟和鐘鼓陳檮蒲六博何續紛長袂掩羞蛾顰織歌隨風飄青雲
良夜半星河傾主人未醉客尙醒二難具五福并億千萬歲延遐齡

燕歌行

嚴霜蕭蕭白露溥三星在房月在天空閨思婦愁城南起看北斗何
闌干樓頭旅雁鳴飛翰口銜尺書下雲端同心爲結緘瑤函下有相

憶上加淪何以寄情雙玉環念欲報之青琅玕山高水長浩漫漫我
欲從之途路難羅帷倚燈曙不眠秋風颯颯吹重關安得送我置汝
前

平陵東

平陵東氣鬱葱大雷電天以風啟金滕告元功誰其輔者安漢公安
漢公坐明堂發天兵下咸陽討賊盜捕亂亡賊盜亂亡疇則使東郡
太守翟氏子不量其力罔畏死天兵桓桓孰敢當所擊者破禦者殲
烟塵掃蕩清一方頸係諸纍俘未央君不見程義公今日繫安漢公
明日帝彼已之子甘若薺天鳳改元易漢制白水真人從東來昆陽
百萬成沙灰坐倚斗柄臨高臺胡不再開塗滕諭九垓胡不再開金
滕諭九垓

鞠歌行

攜玉女邀僊童天門詆蕩開九重揖金母拜木公躡躡鹿盧乘罡風
飛廉導屏翳從周遊八極騎茆龍乘元化入無終千秋萬億齊喬松

上留田 用本調

噫嘻人世大難 上留田 貴賤貧富相懸 上留田 富貴阡陌綿延 上留田

田 貧賤家無一塵 上留田 四體衣襦不完 上留田 毛翮凋疎摧殘 上留田

留田 氣息懨懨自憐 上留田 赴訴司命君前 上留田 我獨胡為蹇連

上留田 夙生期運致然 上留田 飲泣吞聲何言 上留田

董逃行 用本事

東京城郭煌煌 董逃 冠蓋羅列成行 董逃 天禍漢國彷徨 董逃 白晝

兵戈奪攘 董逃 劫制天子侯王 董逃 干乘萬騎北邙 董逃 焚燒廩庾

餽糧 董逃 鄙鳩黃金作牆 董逃 天道好還有常 董逃 司徒祓除不祥

董逃 首惡剗胸裂腸 董逃 膏血燃燈道傍 董逃 百代箴規莫忘 董逃

永戒貪饕陸梁 董逃

悲歌

巫山之高淮水湯湯我欲東歸洛大河無梁船道阻絕登高以望故鄉故鄉不可見熊羆虎狼夾路而成行狐兔失羣我與為侶日暮途

遠傍無旅舍，悒鬱誰語。悲風動地，陰雲四起，仰天悲歌，淚墮不能止。
前緩聲歌

緣木求魚，譬彼入山采珠，意氣雖勤，奈此道路殊總角相親，同室共
居，君心有他，如隔里閭，身非草木根株，他人有心，忖度在余，欲見子都
乃值狂且，嗟他心之人，蟲鳥之弗如。

蝶蝶行

飛來雙蛺蝶，羽翅一何翩翩，掠春風而遊，東園彼姝者，子朱爲顏，年
十四五，被髮齊兩肩，忽來覩此雙蛺蝶，心中以慘然，春風浩浩歲月
行，蹉蛇我欲捉蝶，以婆娑，蝶以雙飛，奈蝶何。

滿歌行

感事作用本調

嗟人世，熒熒若過隙駒，百憂填中，當復誰與娛，憶我年少時，慈親大
憫惜，中遭荼毒，展轉愁悶，歲以爲日，家室荆榛，牝雞奪晨，羅此悍虐
伶俜，莫可告人，彼婦之惡，爲鬼爲蜮，潛行昏黑，無從方物，彼婦之惡
爲虺，爲蛇，造作語言，鼓吻搖牙，慈親積戾，奄忽棄背，黃口嗷嗷，壘埋

山椒篁管炮烙兇威灼鑠姬妾徬徨進退錯愕猶復蚤夜思惟圖覆
厥宗仰面叩天無地自容密計深謀憐不可近風波起咫尺白晝爲
陷穽而家弗殃彼念弗忘而家弗禍彼業弗墮吞聲飲泣以訴司命
君彼司命之君杳若弗聞悍婦持門戶胡以事嚴親嚴親七十餘風
燭暮途逡安能舍之遠去去適滄海濱憂來起中夜攬衣不及晨皇
靈會動變沴氣干天閭大雷電風雨永戒後世人

兩頭織織詩二首

兩頭織織少頰眉半白半黑杯中棋逼逼膊膊倉鼠馳磊磊落落道
傍梨

其二

兩頭織織麋鹿角半白半黑檐前鵲逼逼膊膊林鴉啄磊磊落落荆
山璞

五雜組詩二首

五雜組中天霞往復還貫月查不獲已遇龍蛇

古云歲在龍蛇與人嗟

其二

五雜組芝爲蓋往復還咸陽塞不獲已見襍穢

公無渡河三首

公無渡河大河揚波長鯨如山髻鬢差峩

其二

公無渡河一葦奈何河水萬丈出沒蛟鼉

其三

公無渡河讒言孔多不見申屠負石投河

枯魚過河泣二首

枯魚過河泣宛轉沙泥側神龍處九淵螻蟻安能測

其二

枯魚過河泣定作盤中腊願覓斗升水爲君赴溟渤

少室山房類藁卷四

少室山房類藁卷五

續金華叢書

澱水胡應麟明瑞著

樂府三十首

短歌行

五解

日吉時良嘉賓滿堂星河在天蟋蟀在房

一解

懽娛易終白髮苦蚤

金罍玉尊長夜傾倒

二解

舞袖紛紜蘭膏載焚衛女齊姜左右如雲

三解

有美一人稚齒倩盼攜手同車光華粲粲

四解

翩若游龍邀嬉

入挺蕩意平心永宅大年

五解

善哉行

七解

來日大難腸乾體疲今日不樂歲月如馳

一解

訪我親知總角燕好

踰陌度阡以贈芳草

二解

何以延賓清酒百壺何以銷憂五木樛蒺

三解

美人滿堂巧笑便辟更長燭明今夕何夕

四解

南箕在楹北斗

在簷星河陸離肴醴汎瀾

五解

忽逢安期餽我靈藥主客再拜洗盞

酬酢

六解

共餌大還身輕翼舒乘雲御龍遊戲六虛

七解

日出東南隅行

日出東南隅照我陌上桑
峩峩秦氏樓佳麗鬱相望
飛甍百餘尺高棟五丈強
琉璃爲門限桂樹爲中堂
窈窕樓中女容華世無雙
提籃向朝日採桑大道傍
腰懸瓊瑜珮耳綴珊瑚璫
首戴金雀釵足躡雙鳳凰
吳絲作中襦蜀錦充下裳
紫綺緣領巾綠羅隨風揚
借問汝何名羅敷秦女郎
借問汝安居第宅連明光
問汝適何人家令殿中郎
問汝年幾何十五正相當
行者觀羅敷五步一徬徨
居者觀羅敷耒耜相扶將
趙王暮登臺挾瑟奏笙簧
侍從數百人冠蓋何煌煌
舉頭見羅敷顧盼自生光
遣吏前致辭可得充后房
昔爲千乘妻辛苦行採桑
今爲萬乘后芻豢同匡牀
羅敷仰頭答君侯一何狂
國主位雖尊二八盈高堂
家令位雖卑糟糠亦難忘
尊卑各有分貴賤各有雙
君非秦王子妾非邯鄲倡

名都篇

三河聚年少五都盛材雄
傾貲灞上水結客咸陽東
呼鷹過長樂走

馬遊新豐左橐插楛矢右箛彎良弓控弦疾流星鳴鏑如追風穿楊
競百步蹲甲洞七重仰面落九鳥俯身拾雙鴻萬夫爲辟易觀者盈
道中日暮還城郭華筵撞笙鏞屏間擁稚齒坐右羅妖童烹鮮割翠
縷椎牛炙黃熊酣歌酌太白慷慨噓長虹呼盧列明燭良夜未及終
酒闌拔劍去斜月猶墮隴

美女篇

長安出佳麗宛洛多名姝遊戲芳春日踏青歧路隅銀環約素手玉
珮飄華裾丹霞錯綺袖惠風揚羅襦懸腰燦火齊充耳大秦珠珊瑚
間四體寶釵直萬餘揚音若蕙蘭吹氣勝芙蓉吳姬亮非偶衛女焉
得如眾觀共嘆息日暮羅長衢居者爲忘殮行者各踟躕何來少年
輩三五乘驪駒傾城覩明艷蕩思欲忘軀豈無千金聘諧此百歲娛
疇爲伯鸞匹偃蹇寧獨居寄聲俠遊子相望徒區區

白馬篇

白馬誰家子揚鞭大道傍銀鞍耀明月寶劍如秋霜十五隸金吾二

少室山房卷五
十拜龍驤百千聚遊俠百萬要名娼鬪雞入南內挾彈遊平康京兆
不敢呵司隸爲彷徨胡塵際天起邊烽達長揖大將軍慷慨事
戎行橫行絕大漠虎嘯臨窮荒矯詔襲樓蘭飛書定朔方左射中休
屠右盼伏中行頸係五單于纍纍赴咸陽獻俘詣平樂賜第連明光
歸來顧少婦挾瑟宴華堂

升天行

九州非我宅五岳不足居乘蹻躡浮雲周覽萬里餘朝遊崑崙頂夕
息瀛海隅舉頭見三山城闕正逶迤軒圓嶠聳巨鰲方壺戴神魚西行
謁王母置酒行天厨靈妃酌金液玉女吹笙竽燕樂未及終飛騰起
太虛驂龍叩玉闕駕鳳翔靈旃長揖問軒轅俯身拾帝車明霞爲我
珮素霓爲我裾飄飄謝塵世萬歲同斯須

仙人篇

我思忽不懌投袂起行遊擔簦躡芒履去上嵩山丘王屋一何高太
行亦阻脩危峰冠浮雲巨石橫道周青松數十圍枝葉自相樛上有

千歲禽下有萬尺流矯矯浮丘公吹笙跨靈虬投我不死藥攜我升蓬丘丹霞起素壁紫霧開瓊樓橫飛絕四海高舉臨九州顧視世間人局促安可留朝生等舜華夕死同蜉蝣

相逢行

相逢狹路間騎從一何都借問來者誰中尉執金吾銀鞍耀白日寶劍佩昆吾英聲走劇孟勇氣凌灌夫西征破大宛北顧摧匈奴去年出遑中一戰定羌胡歸來報天子賜第連皇都黃金爲門限白玉巾堂鋪堂上何所有七尺紅珊瑚十干治晨殮百萬當呼盧樂工高漸離蒼頭馮子都長婦字莫愁中婦名羅敷少婦何名字二八酒家胡弟兄八九人各各列當塗炙手勢可熱聲焰絕代無行人但引避無事勞追呼

門有車馬客行

門有車馬客意氣何揚揚千金飾玉鞭百金寶劍裝傳呼動里閭顧盼自生光長婦出迎客問客來何方客言自幽薊乍者發漁陽道逢

遠征人寄書來故鄉開緘竟何道細書八九行昔爲絲與桐今爲參
與商參商各異地羽翼安得雙長跪再拜客邀客蹙徜徉烹庖出豐
膳高宴羅酒漿願爲傳語懽努力莫相忘

遠遊篇

端居厭塵世飛步凌大荒左挾青龍馳右驂赤豹翔西遊翳若木東
望窮扶桑竦身崑崙顛息駕玄圃傍道逢安期生托手共徜徉攜我
黃金臺坐我白玉床太虛爲我宅沆瀣爲我漿俯仰竟百世焉能辨
彭殤

結客少年場行

長安富遊俠騎射出名都飛揚結壯士慷慨聚屠沽百千市駿馬十
千裝輓轡朝遊上林苑暮宿酒家胡赤丸報司隸白刃戕金吾笑傲
金張第叱咤許史途盛年諒難再壯志不可孤鳴弓向張掖揮羽飛
平盧左發摧焉耆右發中休屠死當畫麒麟生當雄萬夫

笠篔引

長時率已邁蟋蟀鳴我床眷言召親友自酒羅中堂東鄰飾妖女南
陌招名娼綃衣隨風舉羅襪自飄揚秦_設被金石楚曲流宮商清談
蔚霞爛妙舞若雲翔頽陽倏西落明月出東方飛軒歷層囿改席臨
洞房華燈吐芳焰列宿澄清光齊心懷令德四坐咸盡觴芳辰諒難
再嘉會詎可常人命一朝盡奄速如秋霜樂哉今日宴百歲遙相望

從軍行

邊塵起西北虜騎日相望仗劍報明主長揖辭故鄉征行渡沙漠
慷慨戎行羽書昨夜至匈奴寇漁陽吏士若雲屯我兵精且強揚旌
耀漢月吹角飛胡霜一戰摧月支再戰係名王彎弓冒頓殪鳴鏑渾
邪降勒功燕然石傳檄瀚海傍歸來拜驃騎恩寵冠長楊

置酒篇

端居觀大運去日常苦多幸有盈尊酒賓朋各來過佳人出後房被
服綺與羅纖腰鬪妙舞皓齒揚清歌輕飈蕩浮雲華星爛明河好鳥
鳴高枝文魚翔素波百年若朝露白日馳山阿樂哉今日宴不飲復

如何

君子行

嗚呼大聖人世或見疑猜周公被流言仲尼困桓魋賢材實累身忠
信爲禍媒蒼蠅點白璧蚊蚋噓風雷麒麟匿郊藪朱鳳成推頽仰天
再嘆息沈憂熱中懷擾擾蝸角爭忉怛勞形骸千秋萬世後愚智同
塵埃

豫章行

騰蛇自有翼未若應龍潛螭屈重淵中潤澤被八埏宣尼浴沂水武
仲巢箕山於陵餞仲子通國稱其廉

孤兒行

步出北郭門荆榛夾路齊悲風起白楊葉落何淒淒道逢孤兒卧肌
膚若蝨蟻伶俜瘦皮骨却立忘東西對我但長跪氣咽不能啼白陳
無罪過父惑後娶妻夙昔千金愛慈母嬌提攜高堂倏背棄妖牝鳴
晨雞風波起骨肉咫尺如秦齊終朝拾橡栗薄暮食黃壘蓬筮動盈

百卒歲無領綈棄置田野間冉冉白日低昔爲掌上珍今爲濁水泥
千秋履霜轍永永戒前蹤

白頭吟

結禱奉明德精誠決浮雲死生誓同穴富貴安足論一朝事勢異緇
邈若越秦風波起對面讒慝來相仍盛衰捷反掌愛憎一何頻昔昔
寒爐火今爲甑下塵還君錦繡段著我苧羅裙念彼求凰曲恨恨不
能陳

鬪雞曲

翩翩五陵少挾彈遊咸陽萬錢飲俠客干鎰招名娼走馬東郊外鬪
雞大道傍兩雄昂然出五色麗且光黃金介白羽綠沈鑄玄裳雙眸
炯相射四距翼而張憑陵壯夫膽激烈猛士腸俱呈慶忌捷競逞黑
卵剛獐牙攫豹虎怒臂撐螳螂先聲驟恫喝後舉劇披猖朱冠碎鞋
鞞彩頰掀琳琅寧論北宮撓肯避平陽創迴身角伎巧聳翮馳精芒
初交氣方盛再合勢彌猖捐生赴仇國效命臨戰場縱橫掣驚電蹠

少室山房卷五
五
跋拏秋霜摧鋒若禦寇逐北如擒王干旄助踴躍鉦鼓隨騰驤天地
黯無色塵沙劇飛揚懽呼壓塵市登眺摧山岡中原逐秦鹿大陸厯
天狼雄雌久未決轉戰益慨慷遲遲白日墮兩敵爲彷徨安得魯陽
刃一揮返扶桑

三婦豔二首

大婦拂花箋中婦理冰絃小婦學彈棋天桃鬪春妍良人定晴覷誰
當最可憐

大婦貼花鈿中婦理紅妝小婦畫蛾眉含嬌踏春陽良人試垂盼良
夜殊未央

廣三婦豔四首

大婦出姬姜族望不可加中婦出燕趙容色鮮如花小婦出吳越盈
盈嬌浣紗丈人但安坐四海方爲家

大婦字若蘭深閨理流黃中婦字羅敷陌上行采桑小婦字莫愁盈
盈居畫堂丈人但安坐滿目饒春光

大婦出迎客二十頗有餘中婦起持觴二九曳羅襦小婦坐鳴箏二人正敷腴丈人但行樂南面安得如

大婦年十九高堂坐携蒲中婦方十七明瓊角呼盧小婦正十五青春獨當壚丈人但行樂何羨執金吾

續三婦豔二首

大婦處華堂玉貌錦衣裳中婦處高樓玉指撥箜篌小婦處金屋玉簪髻初束白日懽未足良夜更秉燭

大婦妝初成一顧傾人城中婦妝乍畢一盼傾人國小婦妝未已一笑傾人主有酒清且旨交加學連理

反三婦豔二首

大婦吟白頭溝水東西流中婦歌懊懣紅顏空自紅小婦咏團扇辛苦郎自見莫誇三婦豔丈人涕如霰

大婦氣食牛千喚不回頭中婦愁緒縈敢怒不敢嗔小婦訴卑賤終朝淚洗面莫誇三婦豔丈人腸欲斷

勝興高直其領三級處文人懸懸福

大歡樂會半千與不似似中波慈慈慈慈慈慈

苦淚自具莫能三級處文人請似還

大歡樂會半千與不似似中波慈慈慈慈慈慈

又三級處二首

笑謝人主首謝辭且言交爪學學學

大歡樂會半千與不似似中波慈慈慈慈慈慈

善贊師東向日辭朱吳真好更乘機

大歡樂會半千與不似似中波慈慈慈慈慈慈

獻三級處二首

春開信獻文人卧卧樂卧秀岸金吾

大歡樂會半千與不似似中波慈慈慈慈慈慈

人五燈風文人卧卧樂卧面安野岐

少室山房類纂卷五 百餘中級或林級二代史級蘇小歡坐如卷一

少室山房類藁卷六

續金華叢書

澗水胡應麟明瑞著

樂府十八首

遠別離 七夕感事作用李白體

遠別離古有之不見牽牛星熒熒河漢湄黃姑弄杼軸錦石爲支機
招要自成匹永永不相疑終朝卧閭闔折花事遊嬉逡怒上帝立
遣東西馳天孫尙爾爾世人了可知酌君一杯酒聽我歌別離君不
見重瞳墮地氣食牛掃除六合朝諸侯美人嬌愛置金屋彭城着繡
誇遨遊時危勢屈走垓下楚歌四面興仇讐蛾眉倏忽化黃土拔山
力盡烏江頭君不見隆準布衣奮三尺蹙項誅秦四海一淮陰蒞醢
百慮空掌上嬌兒夜啼泣迴身楚舞涕泗橫黃鵠摩天招不得未央
美人居廁中地下誰呼寵姬戚古來豪傑流往往稱二子裂背摧天
關五岳任驅使徘徊一婦人竟作別離死何況蚩蚩輩疇能不罹此
房帷僅咫尺陷阱如丘山不信別離苦焉知行路難荆榛莽閨闔對

面生尤愆逝將舍之去去去適荆蠻荆蠻非我鄉念欲還長安載歌
別離曲使人嘆息摧朱顏遠別離何匆匆浮世狹難爲容胡不醉我
美酒三千鍾蒲萄之釀紫花潑綠尊翠杓春溶溶兩手持蟹螯拍浮
玉缸中落葉有時合明珠有時逢人生把酒當盡醉回頭萬事成虛
空項劉兩豎子韞鞬非英雄天孫與河鼓兒女徒忡忡二妃從游已
百歲湘江底事流啼紅屈原李白俱謾語謔浪分明欺迺公大人虎
變挾宇宙傍日月駕雙飛龍黃童姪女永相逐周遊八極乘罡風安
能低眉折腰局促相若轅下駒守樊籠遠別離何匆匆安能低眉折
腰局促相若轅下駒守樊籠

沈存中云二妃從游之時齒近百歲詞人率以女子待之非實事也

飲馬長城窟

飲馬長城窟長城多白骨白骨從橫如雪山風吹胡沙馬不前借問
何人骸暴露置其間云是當時秦王築城卒被驅什九亡黃泉膏血
飼螻蛄肌肉餒烏鳶惟有白骨存安能復持還歇馬上長城觀此重
辛酸令我中氣咽徘徊不能言男兒立功名介冑辭上官橫行萬里

外勒勳赴燕然黃金絡馬頭白玉飾馬鞭胡不奮長劍斬樓蘭束縛
五單于係肘纍纍入長安生封定遠侯冢墓象祁連胡爲老死長城
下白骨支撐玉門關黃榆翳衰草一望徒漫漫子孫不復知悲鳴裂
腸肝腸肝痛欲裂子孫無奈何至今長城下白骨年年多存亡信有
命壯士悲蹉跎閱彼長城卒聊作長城歌長城歌莫哀秣余馬登
輪臺輪臺浮雲極天開我馬玄黃以虺虺當時班定遠髻髮焦黃埃
皓首博侯封慈親溘蒿萊其人至今亦白骨定遠之榮安在哉何異
長城卒埋齒長城隈不如驅我馬舍之歸去來五花一擲換美酒竹
林痛飲忘疑猜雙眼瞢向天白飛行八極騎龍媒

登高丘而望遠海和李白

登高丘望遠海海水何茫茫齊州九點渺空闊東西日月懸扶桑扶
桑宮闕連蓬萊白虹照耀中天臺六鰲矗矗負圓嶠羣帝百千億萬
紛紛跨鶴遊崔嵬岢大舶走徐市安期一去無時回我笑秦王乏
靈骨人言漢武非仙才登高丘望遠海海水茫茫接天迴使我極目

心悠哉心悠哉以彷徨何來龍伯人濯足臨扶桑一釣連六鰲攬之
不盈筐煮鰲爲臠充余糧鰲骨如山今已霜我醉欲卧黃金牀呼吸
靈和挾三光鞭笞漢武笞秦皇周行八極還大荒

白紵四時詞

東園桃李爭春陽美人如花簇華堂彎弓舞袖舉羅裳沈香亭北春
茫茫東風吹歌繞畫梁迴眸一盼神飛揚我醉欲眠黃金牀

其二

南原日長蝴蝶飛朱樓畫閣臨芳池美人含嬌拂羅衣歌喉宛轉浮
雲馳流商刻羽知音稀纖腰起舞光陸離我醉欲罷黃金卮

其三

西堂雨霜胡雁來中天皎月瑤雲開纖歌過雲夜徘徊美人擊筑秋
風哀華陽碣石俱蒿萊荆卿漸離安在哉我醉欲上黃金臺

其四

北風蕭蕭撼陵谷白雪飄花滿平陸何處陽春鬪歌曲雲錦纏頭舞

鸚鵡美人修蛾無疹粟素手垂垂照寒玉我醉欲買黃金屋

虎穴行送曹秀才從軍

男兒墮地氣壓鰲俯拾將相如鴻毛時來擁篲掃六合雲霞五色飛
宮袍君不見蘇秦微時皁貂泣一朝金印都六國位高金多歸故鄉
妻嫂匍匐趨道傍一家骨肉尙如此陌上行人誰家子丈夫恥作兒
女悲世路滔滔競青紫酒酣憤歌歌激烈雙眼橫天日星裂便從東
海批龍鱗更向南山搏虎穴寧能寂寂雞鶩羣燕雀螻蟻爭紛紛金
盤六博飲美酒匣底芙蓉電光吼明朝生掣郅支首辟易咸陽萬夫
走

悲歌行

滔滔百川逝還流夸父逐日不回頭秋風鴻雁春風燕河東織女西
牽牛牽牛織女不相見一似秋鴻與春燕人生有錢付酒家何用殷
憂涕如霰君不見黃河奔流下太行魯陽難返九日光黃金可成腦
可補試問秦皇與漢武

長相思

長相思久離別單于臺上秋草歇玉帳寒朱旗折三年灞陵夢萬古
陰山雪邊笳日暮起塞門流水無聲隴雲咽長相思久離別

其二

長相思路行難玉關鴻雁何時還張霧幄捲雲鬢青燈夜未滅翠被
曉猶寒荏苒紅顏鏡中老空閨日日望刀環長相思路行難

楊白花

楊白花隨風漂泊天之涯深閨無人白日暮金輿玉輦空咨嗟惟有
舊時楊柳樹月明夜夜啼棲鴉

白鼻騮

逢歡白鼻騮駐妾青絲騎羅帶結同心留連合懽被君作千將珮儂
作莫耶鈎雄雌兩物巧相遇安眠玉匣三千秋

擬李白蜀道難作梁父吟

抱膝南陽廬明時甘陸沈唐堯倦六合飛書入深林潁川之水咄嗟

不足洗余耳拂衣長嘯直上岱宗之嶽岑岱宗高高不得上卧龍之
叟來相尋邀余憇梁父重作梁父吟我吟梁父君莫猜仰天叱咤淳
雲開晏嬰侏儒忌賢哲二三力士庸堪哀古來封禪之君七十二其
人一一俱塵埃請爲梁父吟我吟君莫猜梁父中天十萬八千有餘
丈一柱亭亭迥出秦山上砢砢龍從獨立標乾坤恍若元氣浮崑崙
龜蒙鳧繹以東諸阜盡培塿紛紜拜伏羅兒孫決眚斷虹入盪胸明
霞屯手接飛鳥度步學猿猱蹲竦身十八盤象緯漸可捫黃河一線
繞山麓徂徠矯首勢欲吞鹿盧之躑搏旋撇捩不遑息神人絕頂爲
我開天門開天門閱仙籍其間似有胡生名謫向金華煮白石朝從
天門卧夜坐日觀峰峰頭望海色灑灑連長空五城十二樓嵯峩駕
天風天雞亂鳴不知夕迴飈忽卷大海立海水橫飛十洲溢灑灑扶
桑吐朝日紅輪軘軘碾大虛我欲乘之走入極金銀臺殿咫尺間玉
女攜余掉臂入掉臂入謁元君呵赤蜺導黃麟右拍浮丘肩左顧招
廣成神農以還九千九百九十有餘帝揚雷掣電紛紛跨鶴而來迎

鳥篆鴻章闕靈蹟仲尼捫崖恠難識管子云古封禪文字萬家仲尼觀之不能盡識蛟螭缺

落狐兔跑對此撫膺重嘆息翠華茫茫杳何處四顧中原日無色君

不見秦祖龍云亭柴望擁列辟衣冠劔寫如雲虹至今淪沒盡荒草

故物但有當時松君不見漢孝武馳驅樂大延文成鹵簿干旄照東

魯東方小兒弄乃公寂寞荆榛翳坏土吁嗟乎秦皇漢武真蜉蝣我

今胡爲此滯留拂袖行歌下山竟作齊東遊齊東道上逢李

白飛揚跋扈心神投鷓鴣之裘五花馬一醉五月眠高樓吳鈞如霜

雪花落縱橫眼底無全牛我歌梁父屬爾和遙空立降雙青虬世人

拍手笑輕薄我嗤人世真纍囚渭濱老叟太多事行年八十圖封侯

鄙哉齊國三豎子沾沾一果同獼猴力排南山軀九尺殺身反墮侏

儒儁隆中釋耒大星殞人間事事當回頭頭上青絲一朝倏爾變白

髮九州之伯四岳之長如懸疣梁父吟歌莫愁男兒有身睥睨六合

追巢由不然淋漓大白掃椽筆陽春百代鳴天球猶勝古來封禪之
君七十二伐功謝德誇蚩尤君不見七十二家文字總頑石漢碣秦

碑半頽泐惟有青蓮居士梁父吟萬古長懸岱宗甘惟有青蓮居士
梁父吟萬古長懸岱宗甘

將進酒

將進酒乘飛龍滿引太白噓長虹舜百石堯千鍾北斗奉杓南斗從
天瓢出沆瀣大樂鳴笙鏞綃衣萬玉女綠髮雙仙童左拍浮丘肩側
睨容成公百年三萬六千日一日不醉令我行步如龍鍾君不見泗
上亭長隆準公斬蛇逐鹿驅羣雄鴻門高會割巴蜀肝腸鬱鬱長思
東結約五諸侯伐楚彭城宮一朝項氏自東至五十六萬如飄風榮
陽匍匐作降虜何如飲酒來新豐信陵賓客但墟墓古木荒榛穴狐
兔平原毛遂骨已灰黃金之館生塵埃何如一笑飲美酒白眼橫吞
三百杯長安桑落名最古山東秋露清且苦麩米雲安遠難得若下
吳興近堪數世人每病金華甘此酒名高弘正間只今天下貴三白
積薪後者常居前盛衰好惡若反掌時來不得論媿妍太白三閭豈
庸俗一醉一醒操行獨醉者騎鯨上九天醒者反莖蛟鼉腹劉伶阮

籍雙酒狂竹林牛飲稱高陽當時頗遭俗子罵至今百代垂文章今
晨何晨夕何夕庖鱉烹熊羆賓集觴行瑟作不暫停玉椀銀缸興迥
劇三星在簷河漢入扶桑茫茫日東出安得八駿搏長風爛醉瑤池
三萬日

行路難三首

君不見東家叟昔日容華今老醜君不見西家翁昔時豪富今貧窮
盛衰美惡反覆掌造化小兒劇罔兩敝車羸馬聊自儲蕩意平心恣
歎賞人心險阨如山川行路之難君所諳有酒盈尊肉盈几明日咸
陽過趙李

其二

君不見原上草一夜霜飛淨於掃君不見園中花一朝風蕩隨泥沙
男兒快意在行樂何用營營逐飛蘿白日苦短秉燭遊玉碗淋漓恣
斟酌人心對面隔九疑行路之難君所知速來就我飲斗酒倏忽華
顛壯夫醜

東飛伯勞歌

凶飛者燕東伯勞華堂錦帳生蓬蒿少年兒郎輕薄子棄指比翼如
鴻毛咫尺天孫與河鼓歲歲年年隔銀浦一朝烏鵲來填橋猶得相
逢話辛苦脂車秣馬夜不停漂流南北如浮萍當時離別勿復道悲
風冉冉來長檠機上雙鸞手中線宛轉流黃涕沾面鉛華落盡君不
見東飛伯勞西飛燕

少室山房類藁卷六

少室山房類藁卷六

少室山房類藁卷七

續金華叢書

澱水胡應麟明瑞著

樂府五十五首

長安道

長安開大道佳麗壯秦京帝座懸雙闕皇居控百城重關函谷氣夾
岸渭川聲冠蓋凌雲度軒車耀日行新豐花簇騎上苑樹巢鶯鼓吹
元僚第旌旗大將營狹斜何處是北里近西清

黃鶻

何處雙黃鶻飛來目大荒聲傳胡塞遠影落漢宮長
雲入建章誰同二千石萬壽獻君王

雨雪

雨雪霏霏下遙知行路難將軍金甲重戰士鐵衣寒
花度隴殘城南有思婦擁被獨更闌

出塞

隴首雪花飄，征人出渭橋。
長城屯萬騎，大磧下雙鷗。
閃月朱旗靜，穿雲畫角遙。
橫行榆塞外，一戰縛天驕。

梅花落

何處邊聲切，迢迢逐暮笳。
天山飛雪暗，萬樹落梅花。
度漠胡雲斷，飄空漢月斜。
那能遼左客，此夜不思家。

隴首

九月被羶裘，征人上隴頭。
黃龍懸塞色，白馬赴邊愁。
隴坂高無極，寒泉咽不流。
梅花何處折，腸斷在朱樓。

入塞

九塞燧烟銷，將軍罷度遼。
長纓懸日逐，尺組繫天驕。
玉勒飛黃靜，金戈太白遙。
塞門歌舞入，紅旆暮飄飄。

十五盧家女

十五盧家女，盈盈勝莫愁。
冰心持跳脫，玉腕撥箜篌。
拾翠游川上，流黃寄隴頭。
生憎雙語燕，北翼在青樓。

折楊柳

送客灞陵橋，媚樓雪未消。當壚年少女，十五正嬌嬈。柳葉如垂手，楊枝似舞腰。相看不忍別，折贈最長條。

小垂手

錦帳出紅綃，佳人鬪步搖。纏頭矜稚齒，入掌妬纖腰。帝子廻鸞輅，天孫度鵲橋。莫嫌銀漏短，甲煎徹明燒。

征婦怨

去年征鉅鹿，今歲入盧龍。玉塞鶯聲斷，銀河雁影重。裁衣猶憶體，臨鏡懶窺容。秋風起昨夜，牀下又聞蛩。

班婕妤好

長門秋已到，昭陽燿未終。綠苔積永巷，黃葉閉深宮。啼紅祇自惜，擣素爲誰工。惟將舊團扇，寂寂對西風。

劉生

劉生何慷慨，任俠冠東平。五侯前筮借，千乘下階迎。季布匿來久，陶

朱名已成誰言一劇孟能重亞夫營

明妃曲

驄馬載蛾眉明粧出帝畿含顰辭玉闕結恨向金微月疑秦地鏡雲
憶漢宮衣傳書寄鴻雁一爲報龍旂

後明妃曲

出塞涕沾襟遙望陰山陰舊寵漢宮薄新恩胡地深紫駟涉長道黃
鸛寄哀音千載琵琶曲誰明去住心

董嬌嬈

素手撥箜篌盈盈在畫樓玉釵翹紫燕金盆貯紅虬楚臺行雨過漢
殿乘風遊期門諸俠少無處係驂騮

紅虬脯見唐小說同昌公主傳

洛陽道

迢迢洛陽道日暮正飛花公子青絲檢王孫白鼻騎吹金張宅歌
鍾趙李家遙傳麗人至偷眼七香車

秦王卷衣

春色醉秦樓。秦王夜宴遊。響輿迴鹵簿。鳳管吹笙。篴七寶。流蘇帳下。金集翠裘。何人最承幸。卷贈龍陽侯。

銅雀伎

松柏西陵路。君王不復遊。高臺銅雀暮。故苑石麟秋。舞將羅袖歇。歌倚繡帷愁。浮雲渺天末。漳水共悠悠。

賦得盈盈樓上女

盈盈樓上女。十五正嬋娟。照膽秦宮鏡。含情蜀國絃。踏青迴綺陌。拾翠傍晴川。輕薄金吾子。無勞問少年。

少年行

翩翩遊俠客。結束自名邦。過趙黃金百。遊秦白璧雙。鳴鞭中貴避。插羽右賢降。日暮胡姬肆。飛花撲玉缸。

紫驂騮

蹀躞天閑騎。曾從大宛來。懸金當駿市。歎玉過龍堆。伏櫪心元壯。鳴鞭氣不迴。何辭萬里道。逐北向輪臺。

關山月

絕塞生秋早空闌入夜愁光飛銀闕上影抱玉門
流露氣溥絲管霜華拂錦裘征夫猶北戍目斷大刀頭

劍俠行

少年學劍術飛身遊沃寥鹿盧雲氣擁龍匣電光搖醉呵簪句踐怒
罵霍嫖姚夜來風雪猛拂袖灞陵橋

驄馬驅

驄馬千金裝日夕過平康寸心重衡岱片諾迴滄桑日屋笑原季青
雲輕趙張明朝砍文吏竟夜赤丸光

公子行

新開平樂第紅粧簇畫樓驂金作埒鸚鵡玉爲鞦漢宮鳴珮入梁
園挾彈遊海棠花正發選伎合梁州

俠少曲

鳴鞭白門道新柳正藏鴉七寶裝絛弱千金散狹斜飛揚孟公坐調

笑季倫家夜夜雙龍氣
腹間挂赤霞

邯鄲曲

夜宿邯鄲花朝扳瀨陵
柳五侯競獻鯖七貴
爭持酒巨先膠漆契翁
伯金石友縱死咸陽宮
何負將軍首

夜夜曲

樽隱芙蓉麗筵開玳瑁
頻綉屏朝選仗羅幌
夜留賓艷曲梁間度
纖腰座裏陳漸看銀漏
促烏履雜華裯

采蓮曲

桂楫漾沙棠向暮出橫塘
羅裙嬌綠水玉腕映紅妝
攀花憐蓋烏折藕愛絲長
迴撓弄斜影驚起雙鴛鴦

仙人篇

為李逸人題

飛身下七襄駢駕六龍翔
負局行中夏攜壺出大荒
蓬萊千日酒沉澗萬年漿
勾漏砂如石藍橋玉作霜

愛妾換馬

行雨蛾眉去，追風駿足來。金羈沙苑秣，寶屐畫廊苔。太息專房艷，長鳴伏檻材。何當效周穆，綠耳上瑤臺。

邯鄲才人嫁爲厮養卒婦

乍辭鸞輅出，翹望鳳墀高。幸脫君王難，寧忘厮養勞。生輕慙比葉，命薄嘆同蒿。尙異烏孫貴，窮羶配三毛。

其二

新恩借位儷，舊寵易纒囚。飲恨辭金屋，含懷下玉樓。鳩巢元鵲憇，魚服暫龍遊。不見平陽壻，次且擇衛侯。

巫山高

陽臺出，天半高。壓大江，湄暮雨。連三峽，朝雲合。九疑猿啼，青嶂急。鳥度翠屏遲，莫作峰頭夢。魂迷十二時。

芳樹

年年舊桃李，爛熳帝城陰。結實當前殿，開花滿上林。香飛金谷早，影墜玉池深。一曲香山罷，芳菲何處尋。

蜀國絃

春風杜宇國千載寄哀音水激巫娥珮山鳴卓女琴銅梁朝日艷玉壘暮雲深浣花谿上宅詞人可重尋

邯鄲行

狹斜連錦里垂柳夾香堤綠綺千條潤青絲萬樹齊玉鞭騎過馬金距鬪回雞朝日紅粧坐流鶯拂戶啼

艷曲十首

青樓開大道翠館接平陽柳拂葳蕤鎖花明珠瑁梁合懽年少客新鏤鬱金牀

其二

畫閣青門外朱簾碧水潯繡衾描比翼羅帶結同心夜夜求凰意無勞聽玉琴

其三

北陸歌鍾起東郊騎吹旋花香長樂外草色未央前十萬章臺柳玲

瓏拂翠鈿

其四

春光平樂近勝事曲江留帝子聯鑣語王孫挾彈遊共邀金犢至藉
草大堤頭

其五

金羈連綺陌玉珮照晴沙北極元僚第南陽貴主家樓臺七十二日
暮亂飛花

其六

神女雲爲色妖姬雪作歌三千迴粉面二八擁青蛾咸陽遊冶客趙
李日經過

其七

粉黛徵歌伎腰肢鬪舞人綠珠金谷艷碧玉珽春珊瑚十萬樹一
一破瓜辰

其八

明眸驕綺綉皓齒粲瓊瑰挾瑟燕姬肆吹簫鳳女臺巫山何處是指
點片雲來

其九

寶帳連金屋瓊筵弄玉簫嬌嬈花作髻靜苑柳爲腰當歌小垂手爛
熳雪花飄

其十

淥水蕩漣漪江南日暮時吳姬木蘭棹越女竹枝詞惱殺橫塘下紛
紛輕薄兒

又六首

金埒貯驕駟銀粧絡馬頭相逢狹斜道並倚大長秋何用知名姓聯
翩入畫樓

其二

博山銀縷細沈水玉壺香後院通韋曲前除接建章名姝三百輩月
底誦靈光

其三

瑪瑙粧爲砌珊瑚聚作林萬錢編馬埒一嚮試牛心向夕香風動連車
蒸水沈

其四

乳燕穿朱屋流鶯啄畫簷霧消雲母帳風動水晶簾遮莫嫦娥下千
花拂彩蟾

其五

朝朝呈翠黛夜夜鬪纖腰枕上偷金合屏前弄玉簫羅衣三十院無
處覓紅綃

其六

綺樓藏盼盼羅幙貯盈盈霧袂空中舉霓裳月下行相看時一笑若
箇不傾城

少室山房類藁卷七

少室山房類藁卷八

續金華叢書

霖水胡應麟明瑞著

樂府六十一首

企喻歌

雙韃鐵襠誰家大健兒
蛇矛丈入盤上馬捷若飛

其三

腰間大羽箭豎指百夫力
突如飛天鶴萬鳥戢羽翼

其三

落日平原西射鵬控飛騎
九種黑山戎各各相引避

其四

天生健男子何須多結伴
獨身取月支降虜三十萬

鉅鹿公主歌

油壁香車向何許
玉勒花驄汗紅雨
呵殿縱橫灞陵渚
夾岸行人目相語
新封大國鉅鹿主
鉅鹿爲誰大家女

七夕夜女兒歌

儂家白榆樹一年一開花
郎如牽牛星一年一來家

其二

不恨懽意薄但願懽情長
牽牛與織女二年一成雙

其三

一年但一會一夜一年周
猶勝儂兒郎十載客巴州

其四

都將一年意一夜申繾綣
橋畔烏鵲聲天河漸清淺

碧玉歌

莫嫌小家女青春正十六
新嫁瑯琊王嬌愛比碧玉

其二

恨無傾城色不敢邀王憐
相懽那在貌動體生春妍

桃葉歌

可憐王家郎不解事
桃葉清晨渡江去日暮忘迎接

其二

桃花作羅袖桃葉爲羅裙何似阿兄駢終日憐此君

懊惱歌

翻團黃犢車載懽出城東看看白日墮那能不懊惱
誰家嬌女兒三三復五五結伴邀懽行今夜大辛苦

白團扇

白團扇含情待郎來不使路傍見
白團扇悞恨負情儂手持不令見

華山畿

華山畿不願生同棲但願死同止上有雙比翼下有雙連理

安東平

嚴冬凜烈北風雨霜河大水冰斷絕車航
客子遠遊篋篋秦越囊無貲糲帶斷裘結
我有綠袍以遺故人物薄意厚貴稱君身

微物在機是儂手織千縷一丈三丈一襲
東平劉生遠持遺郎愿得邀郎早還故鄉

女兒子

木蘭歌聲起兩岸江陵一夜腸欲斷

估客年年下黃牛巫山十二猿鳴愁

子夜四時歌

大堤三月中垂楊千萬樹郎騎白馬來堤上遙相遇

右春

期懽大堤口遲我采蓮迴向暮南風急蘭橈不敢開

右夏

人言秋日短儂愛秋月光邀郎解衣坐肌膚如雪霜

右秋

蜀爐然獸炭爲郎理瑤瑟不知重簷外雪花厚三尺

右冬

子夜變歌

期懽半夜來忽復月光曉九月芙蓉花顏色詎長好

青驄白馬

青驄白馬嬌成羣往來蹀躞如浮雲
繫馬高樓石城下三百青銅莫論價
七香炯炯並馬行盧家少婦車相迎
鬱金堂前雙紫燕白馬青驄暮相覓

壽陽樂

粧樓百餘尺壽陽開白馬從東來

石城樂

歡居石城西儂住石城東何愁不相見一夜秦淮風

其二

秦淮便風起布帆疾如矢恨殺巴陵秋洞庭八百里

其三

洞庭八百里一夜南風迴送郎到長干泊舟鳳凰臺

其四

攜手登高臺臺荒半野草殷勤傳語郎莫忘石城好

莫愁樂

莫愁在何處石城西南弄手攜盧家郎吹簫跨雙鳳

其二

昔爲石城鄉今作莫愁里開門見所懽容色豔桃李

襄陽曲

襄陽輕薄兒挾彈出大堤嬉遊向日暮高唱白銅鞮

大堤女

大堤羣女郎各各自言好愁殺襄陽兒白日情顛倒

長干行

爺娘錯嫁女嫁與長干商今年發濫頽明年發溇陽

其二

爺娘錯嫁女嫁與江陵賈八月下瀟湘九月下揚子

估客樂

樂哉估客樂黃金作銅使大騙乘長風峩岢發揚子

其二

樂哉估客樂魚蝦賤如泥愁殺閨中婦玉筍鎮長啼

新估客樂

不從估客遊不知估客樂百萬揚州齏持籌勝騎鶴

其二

不乘估客舟不知估客樂十萬荊州娘紅粧照羅幙

大道曲

翠袖紫羅襦胡牀坐明玉相逢謝鎮西邀作大道曲

前溪歌

春蠶挂門口抱絲向牀前鏡昏不見面施朱紅可憐

自君之出矣

自君之出矣鸞鏡黯無光不嫌紅粉污持底試新粧

嬌女詩

莫愁年少女十五嫁盧家雕梁雙紫燕白日坐飛花

江陸女

女郎大堤游顧影各言好相逢平樂兒班荆坐芳草

黃鵠歌

黃鵠參天飛高高上寥廓游戲青雲中那能顧燕雀

其二

黃鵠參天飛九萬忽如馳當時戢羽翼燕雀那得知

石城曲

踏青無限好江頭二三月恨殺潯陽風吹郎下三峽

其二

迎懽不下堂送懽不出戶生憎揚子潮隨郎過瓜步

清溪小姑

小姑青溪曲大姑赤山磯獨處誰相依

白石郎

儂居清溪郎居白石途中相遇宛若舊識

采蓮曲

采蓮復采蓮搖蕩木蘭船日暮湖頭雨羅裙色倍鮮

其二

儂棹湖心舟郎來湖北岸笑指雙鴛鴦戲擲黃金彈

其三

荷葉如儂衣荷花似儂面艤棹向中流權來倩誰辨

其四

昨夜芙蓉花綠堤一時發清波照玉腕下有雙羅襪

出塞曲

大獵漁陽罷椎牛上谷營酒闌飛騎去夜奪受降城

其二

少室山房類藁卷八
三
日暮單于遁長城雪夜飛一軍齊逐北二鼓過金微

其三

拔劍追驕虜黃塵際碧天固原風雨黑前隊縛呼延

其四

漢壁風烟靜胡天帳幕低雙鷗何處落大磧五原西

其五

畫角霜天下轅門徹夜開梅花飛不盡月色滿輪臺

少室山房類藁卷九

續金華叢書

漱水胡應麟明瑞著

樂府八十首

讀曲歌四首

牕前安石榴花開正見汝百舌枝上啼含情不得語

其二

園中櫻桃熟朝暮倩人守昨宵摘遺懽纍纍不盈篋

其三

懊惱枇杷實核多而肉少不療腹中饑那禁眼中飽

其四

郎遺佛手柑馨香動彌月報郎紅荳子相思永無歇

秋閨曲二首

八月秋風起榆關正雪花何因吹妾夢萬里到龍沙

其二

日把金錢卜征人尙未還龍城五千里目斷望夫山

子夜歌四首

開門得懽書有魚長尺一不知溪頭鯉認作潭中鮒

其二

子度饒芳香子都好容髻觸目俱可憐身今阿誰近

其三

懊恨負情儂薄於下秋葉持刀截亂絲肝腸中半裂

其四

燈前驟相見含情不敢道乍可要郎眠那能就郎抱

丁都護

徙倚木蘭花流光莫虛度人命無百年聽唱丁都護

月下童

誰家少兒郎綠絲作單袴白馬紫游韉躑躅長干路

歡聞變歌二首

青梅繞樹頭若箇不作酸君行有兩意莫戀故所歡

其二

十月芙蓉花九月楊柳樹那得男兒心長若初相遇

楊叛兒

可憐白門柳依依二三月一曲楊叛兒飛花亂如雪

江南樂

舉頭見歡來迴撓蔽蓮葉不知湖心娘濕透雙羅襪

幽州馬行客歌

惱殺燕臺騶發足千里遠只解馱郎行不解送郎轉

阿子歌

阿子住東鄰自矜好顏色春風動羅帷半夜邀懽入

湖就姑

大姑住湖口便風渡潯陽小姑住湖心月明就彭郎

上聲歌

春蠶空有絲不解雙雙眠垂楊空有絲不綰別離船

折楊柳

恨殺城南柳絲絲管離別殷勤折贈君記取艷陽且

越城曲

磯頭日浣紗春波瀉明玉指點苧羅村儂家在山麓

春江行

一夜春江漲江頭浪拍天中流便風起特底挽郎船

雙行纏

繡作雙行纏步步嬌春陽那知羅襪中兩足如秋霜

隴頭歌五首

塵起玉門關瑯弧馬上彎身隨漢飛將乘月奪天山

其二

胡兒吹篳篥漢女撥琵琶征人三十萬若箇不思家

其三

絕塞少人行蕭蕭過雁鳴征衣猶未寄大雪滿龍城

其四

欲寄征人信難禁玉筋啼惟應紙上淚點滴到遼西

其五

空閨一枕夢杳杳邊頭去雙鸞不出門也到黃花戍

從軍五更轉

一更邊月上流影照長城營門擊刁斗萬隊寂無聲

其二

二更邊月高戰士攬征袍何時封定遠霜露濕弓刀

其三

三更邊月斜戍客夜思家瓜期殊未及腸斷聽胡笳

其四

四更邊月隱征人夢初醒恨殺城南婦流光伴孤枕

其五

五更邊月落塵起清油幕飛騎斬樓蘭王庭空大漠
長安四時辭四首

攜手七香車春風向狹斜胡姬年二八爛醉碧桃花

其二

太液池邊路輕舟蕩綠荷三千漢宮女齊唱采蓮歌

其三

寂寂霜天下寒砧搗月明長安十萬戶一夜盡秋聲

其四

紅袖炙瑤笙夜醉平原館拂曙共鳴珂天街雪花滿

燕京曲

綽約兩青娥一笑遙相遇何處問儂家玉河雙柳樹

古意

玉帳結流蘇金鞭照春色二入酒家胡尊前乍相識

俠少行二首

白馬躍金環揚鞭大道間五陵春草色日暮臂鷹還

其二

呼盧夜來家醉眠不知曙忽憶灞陵遊拔刀衝雪去

夜來用周皓事

夜渡娘

翩翩桃葉舟昏黑向江夏那怕狂風吹佳期在梁下

江陵曲

惱懽青絲竿凌晨只欲開狂風趁心起四面石尤來

石尤非打頭風
余有辨見丹鉛

執
錄

映江曲

夾岸千桃花紅暈雙蛾綠惱殺冶遊兒絲鞭映江曲

青陽度

金犢遊東郊玉驄返西路相逢無一言脉脉青陽度

長樂佳

深宮鬪百草嬉遊共春日蝴蝶雙飛來故上搔頭立

白附鳩

以我雙碧桃係懼雙紫騮相逢那得去聽唱白浮鳩

同生曲

妾貌嬌於花郎顏粲於玉妾年方二八郎年正十六

來羅

池上雙鴛鴦釵頭孤鳳凰雙飛太無賴孤宿鬪誰強

拔蒲

拔蒲復拔蒲六月潮水中纖纖十春筍不肯露青葱

孟珠

誇他孟珠富却笑陶朱貧西施老歸越空作苧羅嫠

黃淡思

今生作文郎萬恨攢眉頭來生作兒郎饑餓亦自由

白頭吟四首

巴江九曲流不似見郎心蜀魄千年啼是儂白頭吟

其二

大車乘駟馬揚揚漢天使不記當壚日辛苦臨邛肆

其三

箱中憤鼻裊碎破不堪着廻身擲向郎將心自摸索

其四

當日臨邛妻今朝茂陵妾金莖半勺露那能救消渴

長史變二首

懊惱爺娘痴貪他門戶熱措大作官人兒命薄于葉

其二

寧作中人婦莫作上官妻風波起平地山岳移東西

捉搦歌四首

爺娘養女兒但教學鍼線許嫁前溪郎十五不相見

其二

采桑南陌頭田間日來往傍人指笑儂夫婿漸成長

其三

阿母教女兒殷勤候姑眠
女兒問阿母若爲得懽
伶

其四

十四嫁官人抱衾作小妻
終朝大婦罵眼淚洗面啼

采桑渡二首

不采陌上桑蠶在筐中
饑欲采陌上桑使君道傍嬉

其二

採桑作羅綺總爲他人忙
不見長干娼一曲衣盈箱

雀勞利二首

禾傍雀啄啄日暮不得飽
人生無百年別家太草草

其二

丈夫各有志不作籠中雞
朝歌猛虎吟暮從野雀棲

白銅鞮

郭郎巾折角孟嘉帽頰落底似山翁
醉接籬翻轉著

烏夜啼二首

期懽中夜來月光滿庭柱展轉天欲明烏啼石城樹

其二

匆匆金犢車上路正天曉不恨懽來遲但恨歡去早

趙瑟曲

輕盈窈窕邯鄲姬挾琴鳴弦聲乍希梁塵拂空霜霰飛霜霰飛雲霧
集月西沈日東出

秦笙曲

呼盧一擲百萬強妖姬如花出咸陽箏聲嘹唳夜何長夜何長管弦
列過流雲弄華月

江南弄

秋江日暮天無雲蘭舟桂楫何紛紛美人如花簇羅裙簇羅裙鬪玉
腕歌采菱歸去晚

龍笛曲

楚山修竹雲團欒，伶倫截管飛青鸞。美人一曲凭雕闌，弄纖
手落梅花折楊柳。

鳳笙曲

紅爐熾炭玉蕊驕，誰其吹者王子喬。羽衣玉簪行逍遙，聽仙
樂萬桃花兩玄鶴。

烏棲曲五首

步障華燈光照屋，質如輕雲色如玉。白馬金環遊狹斜，楊柳啼烏來
妾家。

其二

鬱金爲堂玳瑁梁，床上流蘇百合香。同心寶帶合歡結，攜手邀郎拜
明月。

其三

錦幔銀屏張五采，華堂宿霧籠香靄。此時心意兩相憐，含嬌顧影不
自前。

其四

疊股釵橫金鳳凰連環交結雙鴛鴦啼鳥啞啞楚天曙在苒容華逐郎去

其五

玳筵張燭三星低羅襟綉褥怯分攜郎騎白馬去關西鳳凰臺前烏夜啼

少室山房類藁卷九

少室山房類藁卷十

續金華叢書

漱水胡應麟明瑞著

樂府七十四首

塞上曲八首

白草連天大漠秋
千家鐃吹古梁州
飛霜爲洗燕然石
上客新從定遠侯

其二

紫電花驄白玉鞭
遠從都護出居延
清秋不辨龍城色
一片黃雲瀚海前

其三

接天烽火照平廬
昨夜單于獵上都
十萬征人明月裏
一時齊挽繡螯弧

其四

絕磧霜飛塞草空
燕支晴色亂雲中
將軍醉擁吳鉤出
萬里胡天照

白虹

其五

塚上明妃草色青
征人立馬問龍庭
西風片月秦城下
愁絕胡笳幾處聽

其六

平沙一望隴雲開
玉笛飛聲夜轉哀
萬里朔風吹不斷
梅花齊落李陵臺

其七

戰馬驕騰大漠間
遙看虜騎薄陰山
橫戈不待嫫姚令
生縛樓闌入漢關

其八

邊烽不動虜塵收
刁斗無聲夜色流
醉殺胡姬油幕底
霜天遙按小涼州

春宮曲四首

昨夜春風拂苑牆三千南內鬪紅粧朝來鳳輦花前過報道君王入
上陽

其二

殘雪初消太液前御溝晴日柳如煙披香殿上承恩早千縷黃金佛
御筵

其三

長門花滿月華高雲鎖珠簾護碧桃夜靜南宮歌吹發新聲遙奏鬱
輪袍

其四

玉階草色上窻紗深鎖葳蕤隔翠華添罷晚粧無一事白櫻桃下試
琵琶

秋宮詞

梧桐飛葉下銀床腸斷秋聲玉漏長三十六宮明月裡夜聽絃管出
朝陽

少年行五首

匣底雙龍斗色流，長安道上紫驂驅。
燕姬二八彈箏坐，千樹垂楊拂酒樓。

其二

平康歸路欲黃昏，下馬青娥白玉尊。
一曲菱歌揮袂去，月明裝束候期門。

其三

五陵樓殿雪初消，玉勒翩翩意氣驕。
落日萬家春草外，呼鷹遙過灞陵橋。

其四

甲第新開上苑邊，滿堂花色照嬋娟。
醉攜如意堦前舞，七尺珊瑚碎畫筵。

其五

調鞭徐傍夕陽亭，繡箴雕弧架雁翎。
夾路萬人齊指處，碧天遙墮海

東青

劍客行

雙丸耳畔雪花明
九陌長安任意行
片語樓中無處覓
夜飛龍躡入青城

遊仙詞十首

玉檢金泥柱下藏
書成函谷暫徜徉
流沙一望三千里
遙跨青牛出大荒

其二

玄圃明霞望不窮
金銀樓殿碧天中
春風似識周王面
昨夜蟠桃萬樹紅

其三

百辟衣冠照鼎湖
軒轅臺殿夕陽孤
雲間獨跨雙龍背
萬頃天風墮鹿盧

其四

七步文章煥斗牛
遮須聊作御風遊
狂揮大筆天河畔
題遍瑤京十二樓

其五

羽蓋如雲下夕陽
俱言浮海謁東皇
麻姑夜擘紅虬脯
指爪偷看一尺長

其六

采石船頭月濺衣
長鯨高擘絳霞飛
安期一見如相識
指點蓬萊萬玉妃

其七

洞裡青霞照玉盤
飛星羣洒石門寒
桃花五報西池發
可奈峰頭局未殘

其八

縹緲飛梁駕赤城
漫勞司馬問初平
金泥玉版長生籍
同向丹臺列姓名

其九

少室峰高接絳河千秋詞客闕嵯峨誰言不是靈仙骨遙夜天姝出
大羅

其十

海上朱明碧霧流五仙同跨五羊遊何如野客金華洞卧領羣羊十
萬頭

雲龍引

芒碭秋空映赭袍龍光雲氣與天高五湖何處無明月斫竹南山坐
釣鰲

後采蓮曲

畫舫青絲蕩綠油羅裙玉腕坐中流生來茵替元同蒂若箇芙蓉不
並頭

其二

湖心濤浪拍天流湖上王孫挾彈遊一派蓮歌何處起大堤齊控紫

驊騮

明妃曲

日斷長安漢使來五雲何處是蓬萊
龍沙月色二千里獨抱琵琶上紫臺

涼州詞

靜夜流雲拂畫檐微風不動水晶簾
紅牙拍按瑤臺上古調初翻昔昔鹽

伊州曲

碧天如水暮雲收明月平鋪翡翠樓
樓上美人三十六夜彈瑤瑟唱伊州

橫江詞二首

結束腰肢賽水神沙棠舟楫往來頻
江風日暮連天起愁殺西陵破浪人

其二

楊子江頭風色狂，白波如山五丈強。自是吳姬慣迎客，來來去去木蘭航。

從軍行五首

大漠秋風吹鐵衣，長城明月滿征旗。捷書飛奏明光殿，昨夜前軍獲郅支。

其二

九月邊頭朔氣殘，賀蘭山北望長安。殷勤去雁傳消息，欲寄征衣趁早寒。

其三

胡天霜色暮淒淒，無定河邊落日低。欲問輪臺前去路，黃雲白草遍遼西。

其四

吹笛關山月半痕，梅花無數落轅門。不知何處旄頭現，一夜漁陽盡騎屯。

其五

白馬將軍慣渡遼
笑提金勒破天驕
五千劍客當前隊
盡虜名王入漢朝

北院詞八首

紫燕雙飛拂畫梁
雕甍百尺隱垂楊
東華門外諸年少
攜手先過白玉堂

其二

西第千門簇五侯
御溝春水逐人流
翠爛熳黃金色
遙指梳妝近妾樓

其三

金水橋邊一百家
家家簾幙護桃花
青衣日暮濃粧出
指點蕭郎白鼻駒

其四

珠簾不動控銀鈎
內苑春光入畫樓
深夜月明絃管沸
露桃花下合

梁州

其五

雙雙羅襪鬪凌波
兩兩沙棠泛玉河
日暮大堤流水急
迴橈齊唱采蓮歌

其六

別開金屋倚岩堯
白玉河邊第二橋
夾岸紫騮三十騎
花時齊過董嬌嬈

其七

綺陌東頭接上陽
娉婷年少舞霓裳
怪來香閣時常閉
盡日濃粧對海棠

其八

靈濟宮前翠幙懸
平康門巷百花連
西園公子攜賓過
十六青娥舞珮筵

南院詞八首

浮雲樓觀接蓬萊五岳三山大內開昨夜春風城外過千花齊發鳳
凰臺

其二

公子連翩挾彈遊垂楊偏拂紫驂騮長干巷裡三千隊若箇新粧是
莫愁

其三

紫燕銜泥度夕陽雙飛南陌認雕梁高門不用尋王謝盧女新開白
玉堂

其四

歡作沈香儂博山雙烟一氣紫霞間千門柳色啼鴉暮自喚情人弓
下攀

其五

桃葉年方十五強春波搖蕩木蘭航不知何事歸來晚狂殺王家白
面郎

其六

萬戶千門玉作臺春風何地不徘徊烏衣巷口紅粧亞一路歌聲鬪草回

其七

垂楊千樹拂紅塵壓酒吳姬動絳唇日暮狂風連袂起飛花愁殺渡江人

其八

城下春江抱石頭秣陵南下是瓜洲相邀女伴尋春夫共擲金錢賽蔣侯

燕京四時詞四首

帝闕皇居北斗間春風長繞玉門關東郊昨夜桃花發一樹先開萬歲山

其二

沈李浮瓜燕玉臺冰山雪峇倚蓬萊珠簾百尺重重下不放人間赤

日來

其三

千葉從風盡報秋長門團扇迴添愁玉河橋畔東流水幾處題紅出御溝

其四

玉宇吹花度栢梁千門飛雪夜茫茫銀笙暗炙紅爐畔一曲陽春漏正長

長門怨四首

羅幌飛螢玉露溥珠簾不捲坐更闌昭陽月色渾無賴才到長門特地寒

其二

鎖閉葳蕤絕履綦宮花猶發萬年枝沈香亭北無窮恨盡在闌干獨倚時

其三

鳳吹喧傳隔彩霞
龍旂搖曳暮雲斜
預知行幸平陽宅
不用庭前望翠華

共四

金屋粧成盡日閒
十年紅粉誤朱顏
腰肢漫自誇纖細
管領華清是玉環

青樓曲八首

十里秦樓近灞橋
簫聲何處起岧峣
珠簾百尺東風裡
雙鳳聯翩逐翠翹

其二

粉面三千照玉臺
期門南去是蓬萊
金鞭暮過張公子
一騎潛呼萬乘來

其三

兩槩頻催過石城
沙棠搖曳畫船明
莫愁湖上千株柳
腸斷王孫作隊行

其四

一樹含桃鎖曲房
金籠鸚鵡喚斜陽
霍家娘子新粧罷
擁髻來迎李十郎

其五

蘇小粧樓隔畫橋
湧金門外半蘭橈
相攜女伴巫山去
昨夜錢塘正上潮

其六

指點平康宿暮鴉
妝臺紅粉簇明霞
曲江筵上諸先輩
躍馬爭尋阿潤家

其七

二八青衣彩袖懸
相逢如夢畫堂前
無端錦瑟撩春思
歷亂東風五十絃

其八

銀牀梧葉墮高秋
良夜吹簫憶舊遊
二十四橋天似水
畫船乘月下

少室山房類藁卷十